


928

4

7

陳迦陵文集

七





湖海樓詩集卷三

宜興陳維崧其年著

富平李因篤天生

錢塘高士奇澹人

選

涇陽任 璣詠菴

秦州鄧漢儀孝威

戊申

弟 維岳緯雲

宗石子萬

叅閱

男履端

姪 伊 校

燈屏歌為周立五太史賦

周侯屏風高十尋枝枝絳蠟如竹林金盤陀結雙齒蒼玉

瑣碎疊千璆琳直裂冰腹色皎皎亂磨去聲雪甲寒森森明

白却令魑魅走喧逐懼致蛟龍吟其餘華燈悉錯落燐績

絲縷疑神鍼高懸瞰比潭上用仄挂斜若天邊參我時鯨

吸復大叫夜半磔磔驚栖禽衆賓權笑不可止銀留梨棗
東西斟吾聞天子大神聖宮中自鼓雲門琴太平玉燭仗
公等詎使壯盛徒抽簪卽今民氣大和樂况值夜漏方深
沉雞豚春社大可賽牛馬下走焉能任角鷹盤空狐兔伏
蒲牢吼地驂騮瘖燒完蠟燭不須睡來朝日出還當心

新正六日雪後同諸子集幾士兄齋頭卽次兄韻

連日春寒未可任山醅纔壓且須斟梅開枝上掀新曆燕
入堂前感夙心兄所居堂卽余
小時嬉戲地街雪踏來狂詎減夜鳥啼
處怨難禁衰年兄弟頭都白權笑真當惜寸陰

燈夕前四日諸同人宴集徐竹逸宅同限十四寒

又逢皓魄掛簷端如此風光不醉難燈火萬家杯底落樓
臺一片雪中寒西京節物人將老南詔烟花事已闌爾憶

踏歌諸士女昆明池上月誰看

竹逸時
自滇歸

哭故友周文夏侍御五言古一百韻

余年十八九猥性喜跳躍出語每排弄作人鄙文弱君時
貴公子交游重然諾長余四五齡矯矯雲中鶴邑中壇墠
盛間日必飲釀與君分兩廣憑軾看犄角偏師不相避各
自謂騰蹕秋鷹側緊腦下草真如削一爲猛虎吟詎肯受
急縛無何邁世變烽火照城郭倔強文士態鴛鴦鈍經生學
而我同袍人一半隱汚濁乃悔向時習大足供嗷嗷遂合
文酒社盡散從衡約君時讀書室爽塏新粉堊中楹列卷
帙南榮蒔花藥花時召故人連日具杯杓商量及醬醢狼
籍到脾臆分曹鬪詩賦促坐雜歌嘏我詩常早成吟聲振
寥廓匿稿懷袖間故欲來君攫移時乃出觀抵掌一笑樂

君才更敏健爽氣淬鋒鏑諸藝無不爲一往自磅礴或起
煎鼎鏗或坐吹笙籥或爲吳聲歌點拍無差錯或爲着色
畫濃淡具丘壑或做顏柳帖波畫悉斟酌擔夫爭道勢屋
漏古釵脚時亦爲投瓊旦從惡少博一子未成盧繞床喝
令着皇天憎跌盪末俗有矰繳借隱竟未能君也釋芒屨
平輿躍二龍青雲翔一鶚錦繡日嶒嶒赤棒何昭灼猶憶
癸巳春鄙人益落魄讐家肉視我張吻誓咀嚼適君畫錦
歸切齒碎齧擊我亡命游俾我罕驚愕吳山越水間掉
頭免人捉一別成蒼茫真如隔山岳嗟嗟轉蓬士流浪隨
秋籜乞食狎江淮謀生拙耕鑿水行妖蛟怒陸行蝮蛇蠹
歲一歸里門鋤田石硤硤逢君休沐歸駿馬黃金絡前庭
羅金張別館接褒鄂更有郭舍人側足善諧謔余每欲詣

君心口自籌度十度過君門九度成退却長貧易感慨失
路增落寞用致余節疎詎云君誼薄攬鏡鬢髮衰出門車
輪各悠悠判雲泥相見何能數甲辰客蕪城秋寺極寬綽
萍蹤復相聚堅坐聽宵柝板劍斫彘肩敲火製雞臠憫我
衣無綿念我稼少獲作書向長安君爲余作合肥公書交誼比花萼
舊尾語嬋媛蠅頭字端恪北行雖未成此札恒在握節盡
返衡廬君又之京洛歲月曾幾時南來消息惡耿蘭耗詎
妄東野信偏確旅櫬沂長淮天寒水方涸廣野風刁騷巨
川雪磽确嗚呼風流盡萬事真零落昔年讀書處園亭大
開拓清泠奧突廊參差瓊瑜幕伎堂罷簫鼓珠場散簾箔
雨澁倉琅鎖苔蝕葦蕤鑰主人竟不歸高樓花漠漠生乘
鮑家驄死羅翟門雀家多桀黠奴一一睨其素艱難絕胤

嗣支撐剝閨閣生平所愛女關河恨綿邈音隨夫滯京邸
憶耶罷梳掠吁嗟一生事細數堪約畧昔在樵李城同君
啖餽飪隕星大如箕中夜萬感作物理與君言從古有蕭
索功名類芻狗宇宙一糟粕勇退古所期急流恐難託君
看五鼎烹何如一丘貉反覆陳苦詞豁達無愧怍君亦顧
我語知我莫子若遲我二十年乞身向主爵青山斲茯苓
白首飯菘藿蹉跎不相待此語記猶昨由來悲九命垂老
闕一着今春放燈夕君櫬來河朔長江浪怒號雨點大於
雹老屋勢欹斜壞墻色斑駁維時值春霖街泥驟灑瀆賓
朋誰束芻故舊無沐柳而我蹒跚來祖哭露雙膊持酒向
靈床所惜無酬酢文苑喪應徐臺班失譽謬作詩叙交情
所愧言詞朴憑棺一洗瀾深夜猶捫摸

再搬寓示一二友人

離城二十里地勢莽奔赴其名曰毫村我昔此間住少保
之所遺木石大堅固排闥青山來遠宅春泉注五畝築室
廬一丘共墳墓旣以長子孫亦可相嫁娶中堂極敞豁後
庭新粉堊簾閣頗周匝欄楹自迴互燠館接涼軒茶磴兼
酒庫堂前兩喬木椽枝礙衢路峭蒨老梅根皴裂怪松樹
吁嗟人事變盛衰若朝露一朝風俗異白日遍霾霧子余
喜剽掠滅獲半嘯聚其人游閒極白手無所作音呼盧飲
食聲噂嚶若風雨又有族長者託名急租賦毀拆偏房舍
爪牙仗屠酷誓作精衛銜詎屑頭目護屋瓦白日飛一一
生毛羽橫流不得安憂來解早暮因之每自反致此定有
故夙昔少猜嫌祇緣讀書怒不如舍此去或用免抵牾昨

秋假福築頗亦協野趣城中諸故人間日必相晤竹木既
幽映巖岫何嬌媻稍稍滌煩襟時時託幽步無何主人至
客屐不遑駐躑躅向陌頭屏當到家具倉皇揖馭僮曲折
詢翁媪側聞西城西老屋半僵什茅茨畧堪葺門內兼有
圃天晴好鋤瓜秋煖宜栽芋門前荆荒陂鵝鴨亦可數便
擬刪冗雜時復防噓吐灑埽絕蝸涎搔爬治桂蠹庶幾離
市囂聊用展獨寤知已來咎予此錯鐵難鑄舍旁多老兵
連雞使人怖慄悍黑稍公飄疾黃皮袴捶毘酒滿溝無事
夜驚呼近此篋易肘子奚作事誤邇時屋價賤錙銖詎難
措矧子盛交游緩急或可訴何來牛馬皂乃作鸞鳳笈長
跽謝客言吾生死章句性拙鄙借貸肉瘦畏傭僱與使甲
吾顏毋寧保吾素獨是聞高軒紛紛欲相顧壺觴倘在門

念之益驚懼室中乏四壁何以延雙屨作詩示故人幸爲
鑒情懷我今詎移居艱難再搬寓

贈徐竹逸納姬絕句五首

個儂粧閣近紅椒小倚身材鬪柳條一事更須驕女伴上
頭五日卽花朝

時二月初八

其二

知書侍女雅堪矜麗殿紅箋手自謄偏賞玉臺新序好知
郎才調本徐陵

其三

綠窗婉孌縮雙鬢珍重人從萬里還怪底玉郎描黛影一
痕絕似點蒼山

竹逸歸自滇南

其四

小閣寒梅撚折枝朝來預卜定情期狂朋昨夜逢人說親
見玄霜搗藥時幾士兄云竹老納姬前一日適見其閉門製藥故詩以調之

其五

靜掩紅閨漱玉膠紫堦草色似青袍小姬採得宜男種相

映堂前阿母桃

竹逸太夫人在堂

短歌酬周聖濤兼呈立五先生

多年冷屋賃不得泥濘連朝衢巷塞旦往城北暮城南老
大牽人脚無力周子貽我一束詩張燈曛黑疾讀之惜我
遲暮憐我窮其中情緒如春絲我今萬感無不有姓名那
足污君口嚙人芻秣供人驅我今不如轅下駒儻人門戶
與人見我今不如梁上燕我在泥塗莫嘆嗟人生知己良
堪誇感君父子與我好醉卽尋君同看花

吳五表弟晉侯自滇南扶鷺山姑丈旅櫬歸里悲喜

交集長歌賦贈并謝張忍齋徐竹逸張履吉張青

弇陳洪瞻數公

燭花空湧搖光芒叩門忽卸遠客裝乍見頗訝語音異久
坐益覺鬚眉蒼兩脚只露蒺藜刺遍體尚餘刀箭瘡倉皇
哭泣目盡腫急遽跪拜頭爲搶嗟乎此是我表弟半生契
濶成參商爾之先人我姑丈廿年流落離家鄉浪仙垂老
客六詔太白無家居夜郎已悲猿叫繞滇樹詎料鶴化歸
吳檣吾聞此行大不易道路梗塞多危岡雞公背滑類左
擔老君關黑如驟綱早行惡木箐霧濕夜過絕棧春泥妨
南飛一鳥不得過乃以餒肉投虎狼此地連年況格鬪連
營鞞鼓盤雲長穿州恐被老兵禁繞寨或受諸羅創何由

歸櫬自天末致此定賴神扶將答言種種說不盡痛定拭
淚難爲詳卽如前月泊楚岸大風暴雨來砰硯洞庭湖拔
一千里淚與湖水相低昂舟師墮水檣舵折天吳劈海妖
蛟翔同舟號泣咎凶具欲投此物後不祥天風人命爭頃
刻豈易今日升君堂言罷鄙人復長拜欽汝孝行踰尋常
養生送死理一致東吳何必誇黃香吳門黃孝子亦自矧
雲南奉兩尊人歸矧
汝至性尤矯激族兄骨亦歸北邙癸未進士吳貞毓客死
滇南晉侯亦挈其骨歸
黃泉骨肉共歡笑青史姓字增輝光因之轉念汝臨發跋
涉萬里誰齋糧作詩永勒數公誼并寫一幅呈徐竹張忍
逸齋

贈任王谷三首

時年
五十

烈士日疊疊君子恒兢兢古之征邁者學與時運增衛武
古聖人耄猶凜寢興遽環賢大夫知非昔所稱矧茲風波

民能不懷淵冰我兄戰勝肥道義填胸膺挺身欲有爲去
聲
歛氣無所憑獨善以樂天肅然古閔曾

其二

西遊灌嬰城北出繁臺道一結丘中廬壯遊跡如掃閉門
讀我書時亦穫我稻田家八九月滌塲風日好勤力賴彊
以有年仗蒼昊椎牛大祭賽蒸豚侑祖考餽餘燕諸父亦
復逮庶老我聞先民言仁親以爲寶

其三

昨一到君門溪風吹笙竽溝塍叢密篠門巷環層湖相逢
少機械淳悶同黃虞鄙性謀野獲於此一躊躕我家在毫
村夏屋空渠渠有田不得鋤反僦闌闌居此意君所憐知
我者誰歟壯年慕柔翰湛沒成庸愚何當學沮溺耦耕以

相於

正月晦日同徐竹逸任青際幼瞻過心石上人晉溪
堂看梅用七虞韻

拂曉出郭遊青山正堪數野寺墟烟積春塘亂流聚溪風
響漁舍僧語雜粥鼓羃歷穿竹林明滅辨茶塢同行二三
子參差歷紺宇阿師竺法溪微義妙領取留客具茶瓜脩
然拂松塵中庭一老樹偃蹇枝柯古墻低禿幹出逕缺巨
石補坐久齋磬澗江梅落如雨

題沈啟南松竹梅圖爲曹蓋臣六十壽

堂上老松狀殊怪蒼皮翠鬣形狡獪疎梅疑是和靖種瘦
竹亦是湖州派畫之者誰沈啟南寫此掛向山中庵慎首
作詩以自壽此意澹蕩誰能參先生六十健無比粉壁亦
懸此幃子自笑盤中惟首蓿其說門下皆桃李我知先生
真丈夫盛年詎肯甘菰蘆好將曹霸丹青手重畫凌空天
馬圖

史蘧庵先生招飲賦贈

蜀岡斜抱揚州郭葛相祠堂亦此中古瓦旌旗殷北斗亂
碑杉柏拂西風江頭愛弟飄零老社日遺民祭賽同今日
一樽還把袂傷心春色雨濛濛

哭史懷永

名詒蘧庵先生冢子巳亥
秋自豫章歸遇盜投水

彭蠡迴帆日驚濤颯未收似聞多剽劫誰與止筮篋咄咄
傷青史悽悽到白頭貞魂應合併間道抵長溝

母夫人暨婦
蕭氏殉節地

其二

宋末文丞相揚州有斷碑至今留令第垂老失佳兒薄俗
文章賤高門道路悲此賢關不細羣盜爾何知

讀蘧庵太史華陽山游草

華陽秀絕古茅峰側嶺廻巒路幾重紫府銀房秋建醮丹
崖鐵縵夜登封一時鸞舞諸天駕萬壑鯨呿別殿鐘媿我
向平遲五岳多君採木日携筇

次廣陵葉才人題壁韻同蘧庵太史賦

驪山風景繚垣邊畧記華清舊笛鈿今日銷魂來馬上西
宮遺事散如烟

丁未秋日諸同人於廣陵北郭園亭餞別王司勳西
樵歸濟南以秋露如珠秋月如珪明月白露光陰
往來與子之別思心徘徊是以別方不定別理千

名三十四字爲韻人各二十句僕以越鄉未預斯
席春日懷人悵焉補作用思字

司勳客揚州兩載實在茲前年八九月涉江想相思歲杪
延令歸枉道仍追隨客夏紅橋遊新荷正參差新荷倏以
長人生多別離准擬君北轅握手當銜綬如何轉蓬士祖
餞乃後期婉婉紅芳年物各媚所私嗟我同人心奚獨悲
遠而含意不獲展追寫爲此詩

春日過聞湛上人寺樓

樓外卽春山山晴意更閒鳥聲沉寺磬花影扣禪關便覺
離言說誰堪共往還晚歸忘曳杖乘月弄潺湲

上巳後二日雨集黃珍百賓月樓分得十五刪韻二

首

雨裏林花故殷劇憐晴色十分怪幸逢名醞開涓滴況
有高人愜往還萬感竟拚雙鬢改半生難得一春閒因君
那減狂奴態忘却衝泥路險艱

其二

辛夷花落解襖後酒伴相牽詎肯還此地夜多頭上月連
朝雨失城南山花經沾濕態偏好觴到謹吹人自閒入唇
美味吾已飽諸君慎莫啜疎頑

新晴過徐竹逸齋時石畔枯蕙復生同莫魯巖兄幾
士賦分得七虞韻

春水沿城趁綠蕪新晴物色勸提壺卽看身外愁難傍溪
喜尊前調未孤老愛琴書消暇日狂拚車馬傲潛夫藥欄
忽報蘭芽長行賦徐卿第一雛

春日接吳錦雯見寄嶺西初集作詩遙訊并懷丁儀

部飛濤

珠江迴雁羽翩翩二月瑤華遠道傳寄到音書剛萬里別
來瘴癘恰三年春溪蛋戶收蕉布雨後黎人種木棉爾自
天南悲謫宦故人出塞益堪憐

友人招同靜安姑丈看牡丹并懷天石在京師分四
支韻用陸放翁牡丹詩句爲起

君家名花天下知深紅淺白開參差異種洛陽暨巴郡促
坐法護兼僧彌風廊絕稱漾幽幔水簾最宜搖折枝獨憐
有客長安去細馬看花還共誰

史雲臣宅看牡丹席上作歌兼憶去歲松陵同看花

諸子

史君一生性絕奇洞開軒檻春風吹姚黃買得百十本魏
紫數恰三千枝層層光奪粉齒苔朵朵色壓紅玻璃凌晨
排闥看花入衆賓劇飲如龍螭我雖小戶怯杯杓豪氣似
欲吞千甌酒酣更憶去年事扁舟曾泊三高祠顧吳謂顧茂倫
吳弘人小修張九臨愛花走相索張徐徐崧之步履偏游嬉舍南
舍北脚不歇老顛詎惜羣兒嗤南郊高士有戚叟戚右門
臨夾浦紛茅茨行年七十筋力健種花盡作深紅肌又聞
城內沈侯宅沈次雪藥欄異卉爭離披主人他出看不得矯
首墻隙徒嗟咨狂游似此踰十日舞衫歌扇何淋漓今年
故園花更好長事況復多袁綵當花不飲復誰待束縛莫
受皇天欺君不見陳生老小心轉癡作人僅免人奴管村
中有花鎖空宅乞食春城空爾爲余村居壯丹最盛

史遠公宅看牡丹

街南池館徧芳菲先一日看花雲臣宅又過君家扣短扉二月鶯聲
人側帽滿城柳絮客沾衣莫嫌中酒年光去却恐看花伴
侶稀明日立五青際俱有廣陵之行憑向尊前話天寶沉香亭北事全非
同史蘧庵曹蓋臣徐竹逸吳靜菴路雋公兄幾士讌
集黃珍百宅同賦瓶中牡丹

簾映層樓幕掩櫺數枝濃艷態玲瓏汲來春澗清堪漱剪
得朝烟睡未醒不分嬌慵因管束便經攀折豈飄零慈恩
寺裡多風雨何似君家雙玉餅

和幾士兄過周文夏園亭看牡丹之作

繞柱循廊檻閣新不堪車過又殘春記爲嵇阮林中客曾
吐笙歌座上茵鶯語正圓如話舊好花將謝倍愁人何須

浪作存亡感飛燕昭陽蹟尚陳

同徐竹逸過叙葵上人半畝居

誰團一把茅恰與青山對隔歲仍復來烟鬟大好在近市
趣轉賒沿溪響偏滙婦女織蝦籠人家磨茶碓樵蹤半明
滅漁罾互向背久坐聞齋鐘輕陰剪園菜飯罷出寺門眺
矚鮮恒態徐侯磊砢人顧我發遙愴緬昔周孝侯英風颯
千載南山空嵯峨射虎事難再阿師復大笑此意非我逮
君看寄託多轉使神明礙何如契無生忘言証三昧感師
妙指示澹語效規誨緩步歇溪橋春寒那能耐

暮春皆山庭砌菊生

茅菊當春暮偏驚物態新江城無老伴霜雪認前身違俗
生何早逢時氣不馴寄言桃李輩相傍莫相嗔

徐竹逸宅看紫牡丹

花最後放開僅
一枝顏色殊麗

春歸花事散如烟笑靨纔呈繡幔前宮女辭家遲入道阿
姨被酒晚朝天也知紫府從來貴此後紅粧不算妍日暮
一枝誰與伴輸他獨立最嬋娟

崇川兩小兒行

盧氏兩小兒前後割
股療母疾詩以紀之

崇川盧家兩小兒十尺犀角光鬢鬢弟兄孝行無偏陂雞
鳴盥漱雜佩觴定省詎逐羣兒嬉一朝阿母病且危頭目
眩運面色薰呼天搶地出涕洟問巫不省更問醫皆言此
疾難爲治此時大兒神猖披躊躇四顧循中闈寶刀竊見
白差差捫着卽是蛟龍螭提刀割股屑作糜精血着劍劍
色奇阮亭云旁染
一句甚奇驚走二豎潛妖魘昨年母病復不支次
兒狂走還嗟謔兄肥弟瘦均此肌療母肯讓吾兄爲引刀

剝肝踈進之是日雷電皆躩踞嗚呼劍芒在前蹈者誰危
機險節同累碁兩兒赴義獨不辭視如梨棗爭相持吾聞
孝爲百行基兩兒至性真人師我歌佶曲非色絲採風敢
告諸有司

短歌別驥沙諸子四首

江頭惡浪高於屋亂帆颯颯啼黃竹行客夜長歌獨漉我
生萬事都茫茫今日何日登君堂奮頰一笑作拍張

其二

金生廓明靜者意有餘欲別未別心躊躇馬生叔瞻倨彊頗愛
渠劉生膚被酒無不有舉觴一飲若鯨吼何可此人不與
酒

其三

四十無成顏色醜三年奔走鞋襪垢青天淚落迸林藪誰
歎歌者云羊曇月生驚砂淅淅吹石楠物猶如此人何堪

其四

長笛長笛太悲切汝是江邊一老鐵笛師鑽孔子將截生
平知已盛孝章彩公爾爲此技真堂堂他日思君易水旁

古歌留別季滄葦先生

江頭旅店一月坐蝸涎疥壁蝙蝠大街泥滑滑不肯乾夜
長攣縮誰能那急鼓拉雜恰二更老客羈孤剛一個隔縣
故人歸未歸路長力短徒歎歎

其二

江風吹客速如箭車輪歷碌過君縣到門恰值君入門失
喜墮車狂欲旋老顛掀却頭上笠洗脚燎衣一相見呼朋

連臂登君堂我心明明燈燭光

其三

昨冬堂堂歲欲徂玉鎗雪片椽燭麤春蠶食紙響不歇倡
予和女歌烏鳥詎知一別卽相見陶陶孟夏重歡呼鸞飄
鳳泊辭鄉國索米不成饑亦得

其四

主人餞客夜未終亂鴉颯杳啼酸風腰下寶刀欲斫地行
間硬句真盤空男兒顛踣儻不死負此一飯非英雄歌闌
酒竭唾壺缺大笑登車與君別

羊流店書緯雲題壁詩後

雁行憶昨先余發夜夜郵亭夢見之今日果逢題驛句墨
濃人去不多時

長清經杞梁妻祠

齊師伐莒潰潰軍多死喪平聲戰骨莽縱橫中有曰杞梁曠
野闐哭聲白日斷行旅可憐數萬人併作長城土萬家皆
有婦亦復同悲哀獨有賢哉女一哭長城摧我行泰山陰
晚次長清縣髣髴靈旗渡水來依稀瑤珮凌雲見上聲殘碑
古廟亂岡西耳畔啾啾謝豹啼南北行人齊下馬尋聲疑
是杞梁妻

平原縣作

戰國六雄蕩天紀賢豪獨數四公子拚將七尺交博徒詎
惜千金酬死士紛紛輕俠走不休一生所急惟恩讐虞卿
樓緩皆上客惟恨未從毛薛游邯鄲城南古都市袷服叢
臺爭跼踞當時惟讓信陵君黃歇田文安足齒古道悠悠

事已陳撫時弔古一沾巾柳綿吹盡征衫破那得餘絲繡
此人

夏日河間舟次

孤篷遠道思綿綿伏枕吟成倍悄然扁鵲廟荒帆似雪
卅城暮草如烟他鄉雲水愁中跡故國陰涼夢裡緣聞道
南皮還此地寒水朱李是何年

芝麓夫子席上贈歌者陸生

車騎營前月似霜珠簾犀押夜堂堂兩行子弟工盤馬能
跨斑駁只陸郎

其二

軍鼓三軍夜色高新翻樂府壓鞞刀燕丹已去漸離死心
折長安獨爾曹

其三

裙幄球場曲調圓清歌妙舞萬人傳卿家大陸原堪笑入
洛空攜論兩篇

其四

明月烏啼曲未終看場腰鼓玉瓏璵帝城才藝誇年少腸
斷延秋老樂工

贈吳默巖先生

我生偏側不稱意角鷹失勢鳴饑腸江淮連歲苦奔走跳
躍只如馬脫韉南譙夫子今健者與我相見平山堂企脚
不怒野夫野捉鼻頗愛狂奴狂君詩體格擅長句舞衫酒
壁都淋浪有時使筆如拗鐵斗大波畫森盤張龍拏豹攫
出險怪韭花蠶尾搖光芒別來忽復七八載星星鴻爪難

遺忘今年燕市作傭保三伏已退啼秋蟻謁公恰值張弧
節興極不辭吞百觴公家兄弟產同日出與麟鳳同禎祥
卽今轟隱夾衢路掖垣館閣爭輝光衆賓雜沓牛酒賀絲
竹絡繹東西廂酒酣徑擬驟白鹿弦拓直欲追黃麀君不
見長安秋雨十日大崇文街上聲砰礪相逢不飲復誰待
況復話舊多感傷如余飽飯窮亦得坐看公等排天閭

長歌程周量舍人席上作

舍人連歲離五羊襪被日直金門旁暑天招我河朔飲紅
玉之椀盛檳榔我聞百粵天下秀倚天拔地成空蒼花田
瓊海一千頃廣南列郡真堂堂昇平遺事盛簫鼓況復士
女多明璫紅棉花月色白誰歟來者云珠娘荔枝磯上又
蕭瑟與客鼓楫凌陂塘紅肌出手已快劈絳質迴船還飽
嘗野夫聞此意便足拄地不覺饑涎長舍人語我客且坐
更有神物纏風霜羅浮頂上怪松樹千顆萬顆爭騰驤雨
中翠鬣色浮動烟裡黛甲形拏張我聞此言亟搖手冷冷
似欲乘風翔尉陀之城在何處奚由晞髮凌蒼茫詩成炎
暑已頓失耳畔忽覺啼寒蟿

大水行

長安急溜白日昏渾河濁浪何騰掀是時雷電互激射十
日大雨如翻盆河流挾雨勢益壯嚙堤潰壑衝城根遂師
匠氏噤不語菱玉悉索徒狂奔宣武街頭十丈地險若水
櫃翻夔門丞相火城不得過牛車日出空啍啍吾聞滹沱
之水來塞外直繞全晉紫崑崙翁河周頌有恒職世欲四
竇修屏藩胡爲喧恣跋扈坐令韋曲成窪樽壞廬抉屋

虐太甚嗟此詎獨非黎元聖人已下責躬詔一言已沛朝廷恩鯨魚水蠹莫浪喜會見金闕開朝暉

長安老屋行

七月八日秋雨大長安老屋同時破北風颯颯曉更號鐵騎雷碾滿城過街頭老革妨熟睡屋裡嬌兒損惡卧后土乾泥無一寸窮巷瘦妻恰千箇老夫此時客古寺目眙口噤只無那倏忽真令萬象失詭譎疑是百靈作讀作嗚呼皇天苟如此何不還家失饑餓須臾門外天漸明雨聲未歇風聲和

地震行

用芝麓先生大風行韻

六月十七風滿天帷屏杯椀大劇顛都門簸盪猶未甚齊魯消息紛喧闐山東大吏羽書至急裝快馬相鉤連相傳

日入星未起可憐人命薄如紙琅琊城外千村盡李家庄上萬人死我昨揚鞭跨驢背一路村墟記其概夜火常從餅師乞晨蔬或向園官貸詎知瞬息遭風雷震霆一擊坤維開久嗟民力亦以竭頗怪天怒殊難迴我生未習天官書誰從薄蝕占盈虛五行妖沴干皇極一片寒芒射帝車是日白日爲之昏海天瀕洞波濤奔泰山坼裂井泉溢變故難以恒情論填谿塞院須臾耳蒿里何從辨妻子長平之坑四十萬積屍未必甚於此骸骨撐拄如山高陰陰鬼泊求其曹天吳紫鳳有底急以人爲戲爭雄豪我向司天驗箕桺寒燈一夜成白首都亭訛言日數至三市居人悉狂走或云彰義門下水拍天其勢竟欲衝甘泉或云七月大地復將震雞狗驚竄如秋烟我時作客望眼枯家書何

日來天衢欲歸未歸不稱意攬翅學作饑鷹呼秋月如珪
復如玦不爲愁人洗煩熱已分殘年飽亂離那得他鄉暫
歡悅嗟嗟我生已後時祗寒暑雨常相隨宵旰已知聖主
意變理終藉群公爲誅求江左尚官府詬租胥隸打門怒
君不見吳越家飛三伏雪江淮田漲一春雨

王禮部阮亭席上送吳雯歸中條山

宮梧金井催高秋禮部招我爲夜游坐中年少較蒼健此
客母乃爲并州言從中條來欲返中條去中條山色青刺
天舊是羣仙棲遁處君今吟卷動王侯快刀健馬百不愁
誓隨鷓鴣鷺朝紫闥詎逐猿鶴巢丹丘君說中條山我唱橫
汾曲晉國河山落日黃漢家簫鼓寒波綠蔓草全縈鸛雀
樓西風自響王官谷弔古須憑酒一尊移家恰得書千束

羨君歸計已先成我在長安嬾送迎秦關明月桑乾水匹
馬相從魏豹城

孫退谷先生招同王敬哉思齡兩先生暨弟緯雲夜
集看劍齋卽席命作看劍歌

秋星簾前大如斗看劍齋中夜命酒先生八十杯在手酒
酣跌宕無不有須臾叱咤平頭奴跪捧三劍當堦趨衆賓
目攝不敢動列缺閃爍翔天吳其一首銳不盈咫款云吳
季子之子其一屈曲如繞指古之魚腸母乃是其一煅煉
非五兵玉鎗墮地啼琤琤截犀剗兕不足怪拂鐘立斷蒲
牢鳴吾聞洛陽街銅駝里中有三河輕俠子醉餘亂舞劍
花紫模糊炤見春坊字徃徃胸多不平事先生老矣夫何
求一生自問無恩仇爲龍性馴不得夜夜神物懸牀頭

先生大笑一拍手劍色淋漓着胸走頭白摩娑萬卷書此
書與劍吾老友出如脫兔處靜女夜闌撫劍相爾汝哀角
一聲斷行旅

和相國魏貞庵先生汎舟詩

栢鄉魏夫子者聖世臯夔盛朝伊傅望隆作楫偏
多印渚之游才重濟川不淺濠梁之興乃因休沐
之晨爰鼓臨流之棹水雲蕭瑟地是漢陂風日鮮
新節同禊飲謝安則東山亭榭頗事管絃徐勉則
南國賓徒止談風月無何而素霰微零涼飈乍激
笳吹競作顧而樂之於是詩紀八章律成四韻揮
毫以賦行間旣珠玉紛馳鼓枻而歌水上亦魚龍
悲嘯不揣巴人之和敢呈郢客之斤

休沐元僚出郭行一時風物劇秋晴恒山恰許推蓬出泚
水偏從對酒清砥柱中流黃閣老徜徉別墅白鷗盟十年
太液從游慣親見西風動石鯨

其二

鄙南形勝連三輔燕趙盤紆好放歌搥鼓颿知迴極浦乘
槎客已上秋河風前刀尺丹楓落月底邊陲白雁多忼慨
便從參佐約只將玉帶換漁蓑

其三

城西彭水碧如烟醉解金貂一扣船五馬山高秋歷歷千
金臺冷草芊芊瀛洲鳧蓼君臣樂里社雞豚父老緣自是
太平公手製亟憑絲管答堯天

其四

風急寒潭落照平仙舟搖漾綠莎輕驚飛鳥鵲秋千里辨
出魚龍水一泓相府蓮中聽趙瑟金莖露底試南京宵關
侯吏參差火隔岸遙聞興霸聲

其五

淅瀝俄從舵尾催悠颺復傍渡頭迴初驚鉅鹿悲風起忽
挾滹沱快雪來訪戴迴舟王子興撒鹽飛絮謝庭才勝游
心自關民社爲兆年豐磬百杯

其六

蕭瑟林花胷角巾優游綠野暫閒身出當寰宇昇平候歸
見田園故舊人軟語粉榆忘日永高談桑柘驗情親獨憐
猿鶴偏惆悵聞道宵衣眷戀頻

其七

蘭橈一棹入蒼茫夾岫爭窺隱綠楊丞相車茵延揖客魏
公簪笏付諸郎十年獨座威儀重一夜扁舟意味長玉靶
珠鞭歸騎晚盈門殘雪午橋莊

其八

布衣踪跡限林臯未獲從游侍節旄想去賓朋多蘊藉望
來雲木定周遭地連畿輔形偏勝歌出臯夔調總高意氣
不禁飛動甚朱絃遙結爲公搽

九日前一日同錢舍人寶汾登長椿寺妙光閣

濁醪竟逼重陽節古寺剛逢下直人萬里思鄉吾較切一
官慢世爾長貧經堂瓔珞飛花雨海國烽烟罷戰塵與汝
妙光樓騁望他年無着共天親

爲李武曾題灌園圖

森森南湖畔聞君舊隱存西風一以到黃葉響空園客子
久于役鄰翁爲掩門披圖重回首怙悵復何言

題女史馮靜容畫蘭爲歷陽趙儀吉賦

相府蓮西嫺素蘭鮑家香茗共珊珊自從拋擲長街裏冶
葉倡條一樣看

靜容相
門故姬

題鄴下聞琴亭和壁間周伯衡觀察韻

人傳鄴下有郵亭拊掌亭前韻可聽我到寒禽方軋軋響
來粉壁果泠泠伎惟繁奏疑銅雀朔客哀絲類洞庭郭索
此宵彈不盡亂山重叠湧秋屏

曉發中牟

馬前殘月在人語是中牟往事空官渡西風入鄭州角繁
鄉夢斷霜警客心愁野店扉猶掩村醪何處求

滎陽

勒馬橫鞭問中原古戰場北風連夜吼白日冷滎陽絕壁
龍形陡崩岬虎氣藏欲尋劉項壘衰草浩茫茫

偃師縣東三里王輔嗣墓下作

陸機昔入洛夜行次偃師我來經此地正值寒冬時蕭蕭
王弼墓宵宵晨風吹

鞏雒道中書所見

鞏雒饒陂陁水土互蟠結抉幽布險勢鑿孔露竒節重隳
積屢屨怪竅囊埽堞居民數百家伏處類巢穴村虛冪嶮
屹衡宇補凹凸批亢架栢案擣虛置櫨稅玲瓏勝鬼工妥
貼儼地設乃知般倅外別自有巧拙東南一土嚙壁若昆
刀切居者累彈丸縹緲詫竒絕重樓俯鳥道甕牖瞰蟻蛭

盤旋萬螺紋雕鏤百蟲齧盡室頗淳熙聚廬復精潔噉咄
雜童穉偃僕半耆耄嬌女曉塗抹瘦妻解補綴春秋放雞
豚早晚閉門闌我顧居者言此境堪咋舌一朝秋雨塌陵
谷遭崩缺將毋愚公移或者龍火掣居者啼向我長跪對
余說前朝昔喪亂賊賊起作孽秦隴跳銅脛楚豫潛草竊
峨峨洛陽道千里大流血白晝舞鞞黃天恣饕餮妻孥
飽刀鋸骸骨供蠹蝨詎料寰宇清及見櫬槍滅興亡祗轉
瞬世事纔一瞥苟活幸至今枯菀何區別我聞吳越間甲
第金張列文椒塗不足更取都梁藝此疑太暴殄翻恐致
蹉跌何如此間人任運無曲折飽飯過殘年踏盡邙山雪

洛陽女兒行

朝登洛陽城暮出洛陽道洛陽城中多女兒洛陽道上春

風吹陸機詞賦成名日王濬樓船得意時陸機王濬才華
盛少年游俠誇名姓金谷園開玳瑁樓銅駝巷掛珊瑚鏡
女兒袷服惜娉婷但願春醒不願醒挾彈只經宣曲觀吹
簫常坐夕陽亭六街三市連青瑣洛下何知有江左賈克
閣內慣薰香潘岳車前爭擲果永嘉名士正風流典午驕
奢百不愁頃刻南朝成六季須臾西晉已千秋桑田滄海
難相待疇昔韶光竟誰在朝內潛悲青蓋非城中暗泣紅
顏改輾轅伊闕一番新寂寂風光愁殺人只有北邙山下
路蘼蕪還作洛陽春

金墉城

西晉矜全盛雄關百二重洛陽年少客挾彈陌頭逢冶葉
銅街麗倡條繡陌穠長衢交畫省大宅出歌鐘事急橫刀

入時危躍馬衝逡巡傾大業僥忽驟羣克太弟長沙又諸
王河間顛天潢爭踐踏國計孰彌縫驥子悲同穴龍齋實
養雖金蠶聲窸窣鐵鳳汁銷鎔典午中原蹙瑯琊道子封
諸僮從此渡江左暫相容運已分南北時方化馬龍可憐
空宛雜何日靖兵烽我到驚殘壘天還迫暮冬華林生燕
麥綉嶺印狐踪風物前朝換烟光古寺濃惟餘陸渾在山
翠落金墉

白馬寺

赤伏推明帝金刀再續承東都求好義西竺到名僧藏訝
青牛逝經傳白馬興五都秋列刹三市夜燃燈是日皇輿
固當時國勢憑鬢雲遮大內法雨灑觚稜綺構珠幡動花
田紺塔層龍宮標寶樹鸞嶺度金繩頃刻悲川竭吁嗟動
土崩羣雄惟郭汜華省又何曾鹿任中原走狐看帝座升
八王多格鬪五姓復頻仍事去情難歇愁來愴不勝銅駝
蹲大道銀雁叫諸陵舊跡行人問豐碑後代增淒涼秋草
外荒塚是摩騰

寄緯雲都門并示里中宋中諸弟

曾約慈仁寺握手告離別揮鞭不容待暮光半明滅料爾
踞長松寒風晚騷屑

其二

汝留杜韋曲我客陸渾山四節一以盡羈人俱未還遮莫
因聞雁益凋游子顏

其三

一弟在故鄉半一弟在燕市緯兩弟在宋中子萬我在洛阿龍

城裏更深欲成夢未審向誰是

洛陽除夕

五更殘臘竟歸去丈夫飄蕩仍天涯千里外人客宛雜十
年前事愁江淮戊戌除夕
在廣陵梅花空綻白馬寺柳葉漸放銅
駝街此間今日無劇孟安能從汝談胸懷

巳酉

人日洛陽對雪

去年人日節一片五湖晴今歲逢飛雪淒涼在洛城梅花
都不見彩勝倩誰成愁逐春盤菜迢迢一夜生

曉發洛陽

東風入潼關積雪映鞏維垂鞭陟修坂浩歌進叢薄回望
北邙山昔賢不可作

雪後從偃師至登封度少室山嶠嶺

巳酉首春月十七渡洛曉發楊林東嶙峋負黍忽拔地湧
出菡萏攢蒼穹我行弭節躡絕頂歎飲灑氣蒸鴻濛是時
萬山正積雪砒岬鐵縮光玲瓏白踏中原莽浩浩紅摸腸
谷光熊熊蒸聞嵩山壓天下五嶽異秩茲當中百王燔瘞
誌昭報列聖柴望彰尊崇我生江表若培塿何異斥鷃棲
樊籠昨年驅車走燕趙亦復羸馬經山東北恒東岱掉臂
過揆竒未獲登巉巖惟茲我更有夙契嶽靈憶昔叨併懽
前朝熹廟歲乙丑余祖六袞孫得雄含飴摩弄感神貺嘉
名肇錫云維崧此行詎料涉山麓禮合膜拜酬神功何爲
過廟不敢入爾與童叟將無同嗚呼此亦大有故貧賤自
恨無終窮短衣蔽骭泥没踝見此轉使山靈恫依人奔走

覓衣食似爾豈得誇桑蓬揮鞭掩面凌絕險矯若鷲鳥搏
天風趁人山勢似相捕遮莫失脚愁虛空

密縣見白松并謁三仙女像

松下軒轅
三女葬處

軒轅膺寶籙功德配羲農貴主埋蘭玉仙根孕老松三株
凌絕壁萬古蛻神蹤銀鬚和烟攬霜皮帶雨封後來緱氏
鶴同日鼎湖龍秀欲叅天闕光能亂夕烽月中尋有路雪
後辨何從撫此成三歎人生詎再逢仙棋消歷劫石廩積
崇墉北望蟲牢邑西臨女几峰風標偏謾戰伐任重重
誓掃鉛華盡羞矜粉黛濃桃源須問渡橘叟定攜筇我到
捫松榦移時展蕙容瓊扉晨啟閉玉珮晚琤琮日落殘唯
寺風沉斷磬鐘珠衣飄碧瓦想像夜深逢

自汴赴許途中作

晨發大梁城薄暮次尉氏荒蓬蔓古蒿頽垣漾清溪溝澮
浩縱橫墟落半傾圯縹馬駐野田據鞍百憂起末流處實
難亮節人所鄙持此硜硜懷長爲客游子躊躇復何言愁
經阮公里

其二

行行涉洧盤升高暢遐眺春疇鳩婦鳴麥隴雉媒噉風吹
櫻桃花亂撲考叔廟吁嗟仁人言諷諫著成效大叔固狂
騃鄭莊豈純孝人生重天親誼士恤名教丞嘗閱千秋詎
曰非感召至今野田中慈烏日爭噪

其三

旦日入許昌風景曠悠哉潁水日夜流天風東北來我思
在漢魏獨立長悲哀當塗志竄竊炎燼成寒灰天子任劫

遷公卿悉駑駘誰知華子魚乃爲勸進魁鬱鬱古繁城空
留受禪臺

其四

吾思荀朗陵家世居西豪皓節不可涅正氣誰能撓是時
東漢末闍寺紛貪饕北寺忌雋烈苛細如牛毛先生秉剛
介識鑿窮織毫安能習姸姍磬折隨爾曹我來賴水陽企
德心徒勞空郊趨兔兔曠野多蓬蒿惟餘八龍塚勢與春
雲高

鄢陵東梁曰緝侍御

鄢陵城下日西初千里征程晚趁墟聞說高軒歸里巷暫
尋幽興狎樵漁春違舊雨論心切花壓層城會面疎憑訊
逃禪梁御史比來眠食定何如

許昌使旋却寄史省齋學憲并同事數公

陰陰水木喚鳴鳩漸近江南景物幽許下羣公如見訊柳
綿飛盡入睢州

看花歌贈侯仲衡

去年看花燕市傍今年看花繁臺下世間萬事劇可憐眼
前一尊且須把君不見野田月黑多饑鳥陳生亦復爲饑
驅故人十載不得見自分老大終泥塗宛丘三月風吹柳
我在帷車作新婦君言道左遙見之憐我形容已衰醜今
夕何夕登高堂狂歌酒行不紀行丈夫困頓亦常事且復
豁達披心腸我家幼弟郊門婿卵翼頻年感君誼我亦鷓
栖事未成賃春正欲從君計對花不飲將如何人生樂極
傷懷多讓西茅屋倘容借坐君桑上我桑下

贈侯叔岱

人傳侯公子家住睢陽城當年意氣蓋天下
襜褕馬稍真縱橫梁園好花開滿院與君今
歲纔相見訝君壯志盡蕭颯憐我衰年轉
貧賤停杯不飲有所思思昔梁園全盛時
丹輶綉轂恣憂擊豪氣跋跋誰能羈自從
中原苦格鬪萬事一往酸風吹闕伯臺前
十步地應劉之塚何纍纍謂劉侯長華朝宗諸前輩念此勿復爲君道
亟取金尊向君倒君家名花天下知君家
兄弟皆魁竒對君看花意便足何暇瑣
屑繁憂爲只愁春雨灑不止惜花憶花竟
誰是惡卧飽飢悶欲死老夫騎馬恨不能
布襪相隨踏泥滓

同郭涵叔侯叔岱弟子萬過飲徐恭士宅賦贈

先生背郭掩柴扉細雨空堂生計微開
徑剛留羈客坐釣

簾忍放好春歸路經梁宋千村盡人到窮
愁萬事非晚合倍憐投分切濁醪寧使寸
心違

其二

憶昔侯生謂朝宗在陽羨藥欄低亞對
銜卮每於燭盡天寒夜細說梁園數子詩
近日餘波饒綺麗當時老輩總衰遲一尊
細酌吾多感正值鄰家吹笛時

過仲衡西村看牡丹同恭士叔岱梁紫子萬弟賦

連年奔走疲筋骨及到梁園四月天老伴
恰逢來酒後悶懷准擬破花前便停歸計
拚疎放得趁春晴且劇顛況是孔家樓不
遠銀鞍亟借莫遲延

其二

信宿看花我不辭逢花欲去更何之一春
偏側依人日干

里間關見弟時

史雲臣云此二語滿紙涕淚

映水更添闌壓疊護風却

愛慢離披試看物態分明甚坐覺朝來送數枝

恭士折牡丹一枝見貽走筆寄二絕句

野夫見花狂欲死一枝折寄勞相將游蜂落絮故相惱不
是詩人底許忙

其二

燧人陵畔開千朵微子城南放幾枝憑誰寄語徐卿道不
分看花頭白時

戲東侯四丈

聞說睢州女較書春愁纔妥上頭初今朝人卧梁王苑歌
板糟床只欠渠

贈侯閣公

叔岱長公

睢陽城中侯伯子矯若千里駒昂昂爾家積德世所羨此
客少年才莫當丈夫意氣本飛動吾儕文筆須清蒼如余
衰賤那足數坐看俊鶻凌空翔

哭侯朝宗先生

雨坼倉琅攬客愁戟門不動鎖空樓全拚蛛網塵碁局曾
倩花枝當酒籌一代高名荒塚在三春廢宅野花稠我來
長日昏昏睡隣笛誰吹起客愁

其二

何李中原俱失志文人似爾更飄蓬城亡陷賊麻鞅日捕
急爲奴復壁中萬卷鯨喏還跋浪九天鵬翼誤培風浮生
久悟窮通理不分林花作意紅

其三

傀俄土木氣難馴酒後論文勢更振每向空蒼追大雅時
於刊落見天真鷹翻兔窟原無跡馬騁蟻封始絕塵最是
飲醇還近婦信陵末路倍憐人

關伯臺下作

輕颺淨纖埃綠蕪沒芒屨漸漸泉眼决交交雉媒乳我行
出郭遊散屨愜所遇遙心會鳴禽霽目契芳樹迤衍歷陂
陀陘峴莽廻互峻嶒觀層阜人云關伯墓纓鬱蕩游氛帶
壑歎宿霧嗟此高辛裔明禋啟庥祚柰何與實沉同氣相
抵牾閱此田中其哀哉一尺布太息不能言藤花落如雨

鳳陽道中

極望真空濶悲來孰與論磴扶孤嶺仄沙黨亂流奔首藉
生馳道櫻桃落寢園百年銀雁出叫月足啼痕

滁陽山行

少讀醉翁記愛其語卓犖茲行過滁陽登頓陟磽确環滁
云皆山益信翁語確余時困於役巖竇迫崩剝攀縞懼蘇
滑捫嵯恨蘿弱稍玩簾泉清復怖惡溪濁遇險屢怵惕出
坎乍笑樂蹒跚蟻緣垤曲折螺旋殼好峰忽撲面蒼紅互
班駁失喜一大呼羣山響鏡鑄乃知古人言大勇亦可學
廣陵送季滄葦侍御北上

去年別公游宛雒御史府中驪唱作銅槃熒熒炤羈賤玉
漏沉沉展歌噓撐腹詩書極輪囷映肉花枝爭綽約我時
袒褐色沮喪公也隱囊態磊落堦下蔗竿舞便中牀上梟
盧喝教着百五十韻詩離奇公作一百五一十八盤路險
惡連年歲稔匪細故近日廟謨饒大畧鋤奸直用繩縛虎

去莠恰如風掃箒已聞反掌決癰疽還說拊髀思管樂天
子一夕開紅門我公再召登黃閣余來甫別軹溪里公去
未離廣陵郭相逢一笑洒淋漓並坐三更絃膈膊嗚呼時
事難爬梳所恃公才善斟酌會與帝治駕黃姚定播皇靈
暢功侔風刮紅旗覆江面天低白浪衝城脚野夫含意百
未申目斷雲帆縱寥廓

曉發如臯示何龍若

一爲杜牧揚州夢十看劉郎觀裡花殘月曉烟無限感今
朝相送只侯芭

梁谿贈吳伯成明府

我家住傍瀟湖水東距梁谿一舍耳蕭晨頻作惠山游兼
載惠山山水自從老客嗟轉蓬大河北岨塵蔽空綠苔

黃柑想像裡紅泉白板畫圖中歸鞭鞞維西風冽暫茸蒨
簷曝冬日側聞隣縣有神君治行吳公今第一吳公治寇
東諸侯況復文藻追曹劉春蠶食紙響不歇十吏腕脫何
能休如今才人天下少公也讀書洞深宵如今愛士公卿
稀公與合肥宗伯好陳生貧賤三十年一生肝膽傾豪賢
只拚溝壑安吾分敢仗文章對世憐見亦不持子公書來
亦不索仁祖米下走余慚孔文舉高名公是李元禮謁公
一盡平生語明日搖船載泉去

短歌贈秦對巖

故人幾載不相見短裘掩髀塵滿面來春乞食繁吹臺昨
秋作客邯鄲縣歲云暮矣風颼颼張帆仍作東吳游旁人
拍手笑不止野夫掉頭歌不休品泉因訪陸桑苧填詞爲

湖海樓詩集卷三
尋秦少游得詞與泉意便足此外紛紛非所求

湖海樓詩集卷四

宜興陳維崧其年著

平湖陸隴其稼書

新城王士禛阮亭

崑山徐乾學健菴

德州謝重輝方山

庚戌

寄緯雲四絕句

前年一騎出盧龍正值征衫怯暮冬不及慈仁成執手累
君惆悵立孤松

其二

瑁璫心情那自聊昨秋又上白門橋青衫一領輸春雪

弟 維岳緯雲

宗石子萬

男履端

姪 洵

校

叅閱

總消時恨不銷

其三

四載京華音信稀我爲杜宇勸君歸如何江左催歸鳥轉
向漳河兩岼飛時余將之鄴下

其四

南雁匆匆欲發時寄君一語淚如絲蘭陵董相埋黃土亟
報憐才相國知悼文友也文友最爲栢鄉所知

經歸德城外追悼侯仲衡先生并寄恭士叔岱

梁園去年花正開江南客子看花來故人留客醉花下春
衫細馬相追陪梁苑重經剛一載故人今日復何在不恨
名花今又開但恨人生不相待君家令弟亦白頭城南徐
五正窮愁早知今日西州慟深悔當年花下游

題聽客圖爲廣陵蘓與蒼母夫人賦

北風作作雜格格風定鄰燈射簾隙口哺孤兒二十年喜
今兒長能來客客來母喜母復愁人生立德須朋儔不知
兒業視兒友有兒莫與庸人游窓前潛心將客聽聽不聽
聲聽情性但令一語益孤兒白日黃泉並嚴敬家貧路遠
容易饑語兒留客入作糜

邳縣經三蘓臺

在城西北峨嵋山下

小峨嵋麓春草長遙天亂石爭礪硯平沙沒腰叫布穀野
水掠面搖篋管誰何桓碑立而怒龜跌剝裂莓苔蒼停鞭
恍觀子瞻字乃知學士茲歸藏老泉衣冠亦瘞是欒城坏
土相低昂嗚呼先生古人傑元氣噴薄生文章西風應爲
薦蘋藻落日何意來牛羊我知先生必大笑揮斥八極排

天閭常州汝州游戲耳青山埋骨原秕糠元豐尚且妬翰
墨何況千載經滄桑爾曹浪怨章子厚君不見怪鴟惡木
啼祠堂

登阮籍嘯臺

跨尉氏東城上

柳花撲尉氏殘雪光皚皚歌馬城東門登臨此高臺憶昔
典午世俛仰增悲哀先生鸞鳳音迢然凌氛埃我生千載
餘此地傷遲來阮曲不可見蓬池安在哉吟罷咏懷詩
色歸青苔

春晚行洧川道中

春愁赴棐林桃花紅瓦屋洧水一以流垂楊自然綠行行
投前坡人家映溪竹

郊縣使院枕上作

已殘街鼓未天明櫻笋年光攬客情最是枕邊聽不得郊
城微月一聲鶯

經葉縣古城

舊葉何時廢依稀認女牆風飄征柝細苔沒古城荒楚塞
驚迢遞吳天入渺茫停車一惆悵不見沈諸梁

昆陽城放歌

今葉縣古昆陽城

西京恩澤專椒房徽侯同日封五王太阿倒柄卯刀折帝
絃解紐炎精亡赤伏之符在四七春陵事業真堂堂王郎
盆子盡草竊大槍銅馬徒披猖嚴尤何人孺子耳敢奮螳
臂排天閭是日勒兵一百萬公然大戰渰水旁窮奇饕餮
豺虎狼驅使百怪如驅羊長人無霸莫敢當鬚髯蚩蚩烟
焰張誰知天意原有屬白水讖緯非尋常轟雷掣電忽然

怒挾砂走石如排牆漢軍乘勝一逐北百萬崩塌聲砰礮
力追惡獸出宇宙重挈八極歸珠囊嗟乎我生千載後經
過此地心慨慷茫茫春草如人長聽我歌歌昆陽

南陽懷古八首

中原形勝古巖疆天與名藩控大荒金冊牙幢雄宛葉珠
旗鐵甲走襄陽時來將相丹青在運去關河殿閣荒極目
雲臺總蕭瑟茂陵何獨怨劉郎過白水

其二

炎精重燼祚將移拜表軍前再出師憶昔躬耕饒大畧到
今丞相剩空祠三分計就風雲合八陣營高草木知兩地
蒸嘗真不忝錦城廟柏更離披登卧龍岡

其三

天馬飄飄貢渥洼漢臣持節渡龍沙遂殲博望封名將不
數蕭曹擅世家萬里開邊親鑿空三秋奉使竟乘槎蒼茫
采邑誰相問古驛叢祠蔓野花經博望驛

其四

古廟巍峩石獸蹲胎簪桐栢蠹龍門濤衝古岬莓苔拆派
劃長江竹箭渾四瀆躬桓纏虎節百王薪棣薦犧尊從來
淮水彌河胃廷算淡知費討論桐栢淮瀆廟

其五

湍水淒淒澗水清商於三戶路縱橫愁因戰壘千端集春
到沙塲幾日晴田父鋤平樊噲塚東風吹老霸王城我來
最有關心事何必經秋恨始生舞陽

其六

堵陽景物不勝愁
戍角征笳警敗郵
老卒負牆談戰伐
亂岡憑碣記田疇
道上桓碑林立大都新墾荒田記實則一里皆草茅白草絕無所謂田也
五更殘月啼鶯換
一片荒城趙水流
往事昔人曾設險
風前重倚郡西樓

裕州城上作

其七

碧雞霸府重人豪
金馬都堂擁節旄
萬里丹崖憑筦鑰
三年綵筆雜弓刀
苴蘭質子檳榔酒
斐斐降王赤罽袍
自渡瀘人不返
冠軍城結怨雲高
追感彭禹峯先生先生曾參藩滇海

其八

依人自惜髮毛班
兩歲浮沉宛雒間
豈待尊鱸懷故土
倍因櫻筍戀鄉關
黃塵遠道雙鴻斷
白月孤城匹馬還
新野舊傳庾信地
哀時同有淚潺湲

宛城署中咏庭前石榴署係南汝道舊宅

作客看花少空庭得石榴
繁花明一樹濃葉暝層樓
雨過丹跗濕春歸頰萼浮
亞簷枝鞞鞞映柱朶嬌羞
往事侯門在奇花絕域求
根初栽繡屐影乍落金溝
窈窕當三伏軒窗擬十洲
裙多那忍妬院悄任銷愁
護日低油幔迎風蹙綺幃
清陰偏澹蕩暈臉最輕柔
倏忽成荒院殷勤憶舊游
空房難結子齟齬怕經秋
鎖澁鋪苔蘚臺歌叫粟留
摘織誰攏髻起早記梳頭
我亦飄蓬士閑經消水流
浹旬勞慰藉計日動離憂
時將去懸瓢家在新羅國來從博望侯
故鄉千萬里開謝任悠悠

見署後牆外榴花兼憶亳陽舊宅倒用前韻一首

誰家紅一院相對意悠悠
衫似分中婦門知定細
侯漫看

先索笑未折已忘憂蔓弱憑鶯織柯叢任蝶流迢迢當路
口故故出牆頭擬摘前還却頻窺去復留眼明應破夜臉
曼易逢秋遇爾添新感令人憶昔游我家街影靜背水櫓
聲柔堂後峯千笏欄西月滿幃此花開最艷入夏不曾愁
宿窀垂隣壁扶疎蔭隔洲子多宜繡戶果熟溢金溝舊宅
多時換名葩何處求賃春前路拙乞食壯顏羞客夢歡重
見家緣恨轉浮此生辭畫屋屬咏寄形樓不及梁間燕朝
朝啄海榴

宛城咏古

朝出宛城西古墓何纍纍太息塚中人云有百里奚荒塗
叢糴貉古壙嗥狐狸消水流其前空宅亦在茲於戲秦大
夫志行何經奇暑勞廢蓋乘功烈張西陲當其貧困日漢

落成纖微束縛壯士心浮沉屠僧兒英謀算馬齒賤業貪

羊皮污鄙若無用深沉將有爲三復屢屢歌曠野天風悲

其二

生世事不諧乃值離亂秋結髮讀詩書歲月忽已邁出門
狗衣食洪忍增我羞腐鼠或見嚇鴻雁思其儔憶昔東漢
季時事徒紛糾闈人暨外戚此輩難與謀鬱鬱張平子端
居詠四愁

其三

驅車泚河陰縹馬昆水陽荒塗一直視曠野惟白楊齒豁
骨樹根搖潦汗縱橫舊鬼不復悲新鬼或自傷驚沙一以
吼白日蘊晶光我時問耕夫皆云古戰場人民糜爛盡姓
氏登旂常顧此勿復言憂來浩無方如何用人命藉以成

侯王卓犖嚴夫子垂釣臨滄浪

其四

峩峩南陽城鬱鬱樊重宅赤瑤作庭甃青珉作堦石驅使
及神鬼關通半賓客嗚呼母后家勢焰頗薰炙榮華有代
謝時世遙催迫至今繚垣邊隱隱土花碧

其五

穰侯太后弟權大主亦震性惡諸侯客往往恣排擯無何
王稽車陰載范雎進危言悟昭王抵巇復乘釁倏忽封應
侯功名一朝振詎知羈鼻人傍更睨其印

其六

東海有郟城乃生徐僕射北齊庾蘭成家本在新野前年
游山東道經郟城下今年客宛城襄陽距一舍六朝綺麗

人萬古松楸夜文筆空飛騰水雲極悲咤

汝寧雜感

莽莽平輿對水開年年汝水抱城隈已拚客到中原老更
值秋從絕嶂來沙接郡樓寒拂檻風傳戍鼓暮啣杯秦川
公子飄蓬甚廢宅重經祇自哀

郡有王
榮宅

其二

繚垣榭葉亂熒熒鎖院陰沉薜荔青爲怯深愁消短燭獨
携橫笛上空亭關山瀕洞么絃斷身世蒼茫急拍停忽憶
寢丘蘓處士白頭江海恨飄零

蘓崑生固始
人精於南曲

其三

鉤罷風簾夜氣清樓頭北斗掛簷楹一年弟妹鄉書斷雙
眼乾坤物態更名士汝南多舊蹟將軍新息剩空營可憐

砧杵依微裏已有征鴻度郾城

其四

魏祖南征沔漢來翠華饗士此高臺水如懸瓠誇天府詩
鬪江蕭擅霸才落日孤城幢蓋動西風干騎鼓笳催飛揚
意氣今誰在漫溯寒流首重回

府城內有方丈竹堂為後魏高祖幸懸瓠亭從官處

其五

神堯天子奠金甌奕葉屏藩職貢修詎料長淮驅虎逞翻
貽共主廟廊憂精兵十道屯泗曲大雪三更壓蔡州盛事
恰須誇述作韓碑柳雅並千秋

其六

瀕河流水正潺潺絕險長誇真阨關地入楚天雄九塞路
圍申戍斷千山蕭蕭朔吹城猶在漠漠寒空鳥自還猶是

舍人吟眺處風流搖落許誰攀懷大復先生

其七

寶慶年間剋戰期那顏孟珙大興師亡羊不信牢堪補拒
虎還嗟厦莫支遂奪柴潭摧伏弩竟麾金柵豎降旗誰云
汝水聲嗚咽說到西湖更可悲

咏幽蘭軒故事

其八

落日蕭蕭袁愍孫客心悽斷不堪論最憐祖德留三楚曾
捧君綸下九關浮弋山高棠蔭在仙居縣僻履聲存百年
父老桐鄉意累爾祠前瀝酒尊

余大父少保公起家光山令惠政載汝寧名宦志中

汝南咏古

烈士狗名義嗜若酣杯酒人生天地間志節視所取漢季
盛黨魁汝南實其藪陳蕃與范滂矯矯立朝右此皆國老

成練達固不苟云何兩年少亦與爭不朽臨固勇旣沉彈
冀力復厚郭亮甫成童袁著年十九

其二

末流尚崖異薄俗善抵摺寥寥千載間我思黃叔度時事
至桓靈羣閹竊國步甘陵恣品目郡國炫厨顧失之生痕
痛得之長毛羽虛聲煽賢豪餘波駭行路獨有千頃陂不
受黨人悞牛醫大自佳仕亦無所忤

其三

平輿有二龍少者尤溪適鄉里藉品覈月旦成陽秋功曹
雖小吏儁氣軼不收一寸烈士腸詎爲賢豪柔曾來潁川
郡好作長者游一府盡交驩不詣陳太丘私以語他人憂
其道難周末俗工傳會妄引相糶繆視茲磊塊人躡足徒

增羞黜哉曹孟德自負奸雄流一語當意去掉頭笑不休

其四

結交亦何益客游登古臺臺高空復存但見蒿與萊昔人
雞黍處弔古有餘哀元伯不可作巨卿安在哉歎息汝河
水悲風千里來

其五

汝南袁本初家世爲三公姿貌旣瓌異賓客能關通東京
昔喪亂董卓汗神官一言不合意出門如飄風懸節奔冀
州糾合諸驍雄逢紀善謀畫審配尤公忠陳琳老文士視
曹猶蠖螻快意於檄書罵之及若翁至今千載下浩氣凌
長空云何邁末造躁率難成功官渡紹旣蹙壽春術亦窮
家聲一旦隳愛子誰見容烈烈袁弘甫先在蓬蒿中

秋杪送史蘭幼歸江南

澹澹秋雲薄湛湛楓樹疎蕭晨八九月送子賦歸歎涼飈
翼輕軒總轡遵郊墟詰朝發雍丘日沒宿已吾翩翩南行
子影纓纒華裾矧君擅家慶天倫樂有餘悠颺雜萊絲婉
婉隨潘與時侍太夫人南歸計程皓魄圓定買京江艫田園足慰
藉文史良敷腴獨惜同枝鳥倦翮不克俱原野羃層陰霜
雪謠載塗君其慎眠餐保此千金軀羈人送歸客憤恨起
躊躇

感舊絕句

吳孝廉問卿

山寺荒園認劫灰當年高士此中來羅浮雪萼三千顆一
樹花供酒一杯

孝廉諱洪裕余姑丈也祖達可父正志皆萬曆間名公
卿孝廉甫成童卽登乙卯賢書貂蟬榮戟甲於吾邑家
蓄法書名畫下及酒槍茗椀陸離班駁無非唐宋時物
城中別墅曰雲起樓極亭臺池沼之勝面水架一小軒
藏元人黃子久富春圖於內鄒臣虎先生顏曰富春軒
郭外園林名南嶽山房遶園悉種梅花約有千餘樹每
花時孝廉輒携榼至巡繞花下一樹必浮一大白醉卽
陶然卧花下孝廉無子死之日捨南嶽山房爲楓隱寺

盧進士幼哲

碎裂紅旗裊箭瘡具區血戰事堂堂常山兄弟聲名在重
說盧家第六郎

進士諱象觀大司馬九台公弟也行六舉壬午南畿解

元明年成進士自念家世忠孝不欲苟活卒死之進士
耻小丈夫且生平多狹斜游余猶憶其在歌伎璧生家
酒酣跳踔時也顧一臨大節遂能自引决如此男子哉

尹主簿南屏

釀酒澆花一老翁左車缺盡耳微聾年時記得經過熟翁
住橋西我水東

主簿諱京吾鄉碩德也生平悃悞有古獨行君子風與
祖父交凡三世矣年踰耄耄矍鑠善飲酒家居鉏隙地
數弓種秫之外輒雜蒔花藥花時必折柬招余歲時伏
臘輒以笋豉拒菽豎醬噐雜小物相餉必誠必信硜如
也被酒語及先君則浪浪涕下不可止年九十餘卒水
東余村居地名

徐太守映薇

風流太守識宮南城北迎賓燭萬行今日歌姬都入道聽
歌人况客他鄉

太守諱懋曙崇禎辛未進士官至江西吉安府知府性
曉音律喜賓客家居蓄女伎一部姿首明麗正末湘月
且泥凝香花想色藝尤為動人數邀余焚香顧曲歌絲
髮影輒縈人心臆間無何太守既亡歌姬亦散聞湘月
已黃帔入道矣

吳秀才傅星

鬚如蝟磔面微蒼客死青州事可傷今日城南誰老輩黃
安仁安仁令對萬臨漳臨漳令

秀才諱帝賚文筆兀昇意氣甚豪生平以詩酒自命客

死山左邑人惜之黃萬其一時同輩也

蔣公子瞻武

吾邑臨池誰絕妙蔣公解作擘窠書郎君大有家雞好屋漏釵痕也不如

公子諱胤睿磐初先生次子也先生善書法公子能繼之一時有二王之目少以高才爲博士弟子員氣韻蕭遠文筆雋異所居城南擅水竹之勝日與余輩賦詩飲酒於其中無何以憂卒

周侍御文夏

一樹棠梨落復開花時不見主人來昨朝訪妓園西過親見園丁掃綠苔

侍御諱季琬尚書在調公季子舉順治壬辰進士選庶

吉士出爲御史巡按湖廣歸築園亭樓臺花木甲於吾邑不三月而成未數月侍御卽游宦燕臺數載不歸卒於京邸侍御少與余同學以文社相流連登第後頗有急流勇退之志惜乎其不逮也

吳秀才又艸

風情瑁瑤偏無賴筆墨蕭閒也不羣憶得秋城鴉萬點墊巾常與立斜曛

秀才諱湛吾邑中高材生也申酉間以詩酒自廢淡澹歷落酷似晉人與余交最善卒後一女嫁爲余猶子婦許秀才肇麓

博進負多逃地下詞場名重蓋江南今宵客館沉沉雨遶柱微吟憶許三

秀才諱塤友行三才情清綺惜稿多散佚不存猶記其
春閨蝶戀花詞有云喚到侍兒何處使鞦韆架下尋梅
子其風調可概見矣秀才負才不偶棄諸生不事去逐
間左惡少年游樗蒲六博負進數百萬竟以此死

周進士頹侯

斷紈零墨總離披董巨荆關作本師至竟嵇康東市日琴
聲日影不勝悲

進士諱世臣生平筆墨淡遠方袍道服不異苦行僧最
精粉繪矜慎不妄作自娛而已後以蜚語株連論死

謝孝廉彙先

半畝牛宮繞菜田鋤畦汲水亦徒然芒屨一緉千金直不
踏城中二十年

孝廉諱遴登崇禎癸酉賢書亂後躬耕鄉隴足不至城
市者二十餘年遂卒

吳逋客清聞

傳聞陽羨吳文學老作天南响町侯今日頭嚙書不得點
蒼遺骨倩誰收

逋客諱其雷故邑弟子員也國亂後棄家走滇黔所傳
聞異詞後卒

尹布衣叔文

屠狗吹簫賣餅儉獨將然諾重生平裁詩點罷山陽鬼遮
莫羣公裂眼爭

布衣名質鬻畚削漿目不識丁而肝膽輪囷有古俠士
風曾襍被從予入燕及余將游沐布衣別我三千里徒

步歸歸未一歲卒

蔣道士函九

澄潭道士蔣函九丹房彩翠光纈紛呼我便爲許斧子邀
人夜禮上元君

道士少曾爲諸生精服食之術庚寅歲余患瘵幾死道
士授余以煉氣法遂愈其人儵然塵外亦一奇士也

僧寄寄

多時粥鼓斷經厨曾作朱門老灌夫一事繫人忘不得八
句鼓棹破孟湖

寄寄俗姓蔣字仲質名爾文新安人也少時挾萬金謁
選都門爲平康狹斜游不數歲斥廢畧盡慚憤不願歸
客余家者垂三十年久之爲僧於吾邑之西庵歲辛丑

年八十有二矣是時余讀書廣陵寄寄衝寒過訪曰余
年八十三當死此來欲與君作別耳歸一載果死

述懷寄季滄葦侍御卽次其見贈百五十一原韻

別君燕薊游急雨鳴琮琤斗酒作離別片言結豪英挑燈
唱昔昔脫帽歌行行脚底黃河流頭上白日明晨炊土銚
仄晚渡繩橋橫古道大屨屨長驅增駭驚監奴馬搥怒寶
幟流蘓縈獵徒一相遇髀箭饑鳴關河苦格鬪畿輔疲
徭征以茲慘不歡頓令人命輕都門住半載珠桂愁縱橫
秋霖嚇寺塌夜漏喧牆傾渾河一夜決勢欲無幽并揚髻
水怪惡吹沫鯁魚獐老客百憂煎何異遭笞榜仰天燕筑
裂碎地胡琴鏗攢眉嘔羊酪染指辭龍羹遊興入中原意
蕞抽芽萌三更醉馬厰五更出北平皓月吐金槃倒着易

水生太行百斛黛日與車輪迎鄩南盛古蹟泚水動悲情
是時秋屑瑟此地多兵爭殘城積磴磨廢墓號狸猩漸過
臨洛關趙郡勞肝衡鄴園埋破碎爵瓦飛趨趙空於土花
繡想見曼臉頰叢臺趾欹斜漳河腹膨脝前行淇縣近舊
邱雕鏤精瑤堦墜曲瓊球軒胃珠緝撫景益咨嗟怛若遊
孤塋祇喜客衣單母憂健兒偵廼思我鄉園穫稻欣西成
孤客方薄游疇能測虛盈惟因覓饘粥詎曰趨公卿倏忽
渡黃河迅溜吹竽笙沐梁次第出城堞參差呈依人入官
廨俛首棲簷楹眯目灰飛揚聒耳砂鞠鎗蓬蒿螿牆脚蝙蝠
窺燈檠主人劇見知譽我以國楨量身製袒褐借書堆
老棚時時霑盤飧稍稍出嚶嚶悲起突危鶻憂來掉長鯨
遂將勾異錄一一詢老兵兵言昔全盛作樂殊轟轟春游

州橋鬧夜市繁臺岬一從水齧堤不見人飛觥至今闕關
上隱隱波濤聲管井戰血斑的礫如紅櫻空留歌舞窟啼
殺枝頭鶯撥置勿復言且自投吾瓊北風夜來厲大雪鋪
瑤瑛明當發洛陽篝火炊紅粳輦訾足崕谷谿鈇難爲名
南登鞞轅滑西眺潼關晶天險逼武牢直視雙目瞠居民
半陶復不顧陵谷更土囊截櫨枕窟室孀孩嬰架空怖累
某鑿孔愁五丁風景信幽譎臨風自歌賡歇馬東漢寺弔
古成周京煌煌銅駝陌植立惟椐檉蛙黽產行潦豺犬嗥
溪坑父老爲我說明季當崇禎兩河煽蛾賊穢濁不得清
倉庾受爬搔藩溷被淘澄焚燒延殿閣酷虐踰秦嬴諒難
完骨肉奚暇恤餅簾聞言毒中腸趣駕摩前旌迢迢陸渾
樹渺渺伊陽程紆回經郊縣水色滄瀛却望小峨嵋秀

拔蓮花擎摸碑認幽翳懷古搜榛荆昔賢埋玉地百草不
敢榮長杉森劍珮流水鏘環珩安從擷菹蒸誰爲刑毛駢
郊有三蕪墓重復渡清河千里罕鋤耕枯柙裂蛇腹窪谿踈
睛憐此境崛竒幾回笑絕纓我聞古南陽碩大而魁閎襄
樊溢邸閣宛雒出嫫媪閒坊抵鄠杜竒園多奉誠崽子慣
宵啼妖姬善春醒千門縹綺繡九廟陳琮璜豪家設裙幄
狎客煎旗槍如何千餘年此地惟連營剗剔及鈿瑟摧燒
到蓀蘅高門圯城室畫棟黥欄楫在淵無魚鯨在山無橘
橙斯世乏霸才敦槃誇會盟手揩金鏡淨再使瑤樞貞念
此有餘悲逝將凌八紘快隨劍首映擺落儒冠繡高談狀
嶽嶽長嘯聲嗶嗶何當鑽故紙直欲磨新硯入楚友石乞
過晉揖貽甥何難學牧羊亦可爲養性攝目三語掾掉頭

五鼎烹此意雖詼諧仍然困燕菁朝朝溷與隸夜夜惜媼
姪空留俠烈腸不敢辱父兄愧無穢趨態足以供使令吁
嗟生不諧焉能免譏評潛鱗遺密網俊翮觸修緝昨又過
汝南獠狂逐麋麋今財返梁苑短髮垂鬢髮昔爲鵠與鴻
今成蠖與蚤身名難苟立門戶何由振廣陵憶送公霜月
愁羈惲船頭水大上白楸河夫拌夜闌經筵社路恰百里
羸美醞煖我顏金鏡刮我盲汲古譯烏篆說詩箋鹿茸爲
我致苦言慎勿饕侯鯖子聲若金石可以叶韶諛行年四
十餘何事依朱薨家山善權洞仙藥紛靈蔓勉旃桑榆收
莫使虧粢盛侯門無幸舍天涯多戰軻躡屩蠻霧濕濯船
颶風颺再拜勒公言識公氣誼宏聞規不知警我豈人奴
剗比來君相賢協氣滋農畝師師丹霄鳳矯矯垂天鵬求

材畧癡垢器使隨甌罌公正作諫官言事關宗枋百頃太
液池水殿灑滄泓早朝侍黃屋旭日懸朱鉦我公上封事
大義呖鐘鐙豈無夾城仗視猶蟲豸蠚九重霽顏聽傍嘖
龍樓鷓君門鼓雲和大絃鳴庚庚從茲百僚上凜若冰車
碎余留梁宋間但解啖飴飭老女只獨宿鬻盡釵頭程寧
無新嫁娘袷服飄珠璣相逢匿牀下恐便遭其矚自顧毛
羽枯難上黃金城且卧朔客鑪碎擘邊關箏可憐吳下儂
老喚賣餅僮錯追燕代騎久別湖鄉鵠功名誤絳灌塗轍
妨韓彭不熟爾雅注幾昧蟹與蟘生平仙佛志乾死儒門
根頗思游六庫畏守下里費鉛刀仗確錯鈍質須磨瑩焉
能老釣竿日數江邊靖貧賤百事難扛鼎力不勅還當仰
煦沫勿復嗔迂僇發言愧魯魯幸公諒經經

重過鄭州驛再和壁間芳芸女子韻

廢驛蠓蛸結網低亭欄依舊事全迷重看墨較前番淡乍
到苔經二月萋颯颯風簾疑霧髻膠星角促霜蹄如何
不定微波意猶得長流洛浦西

覃懷署中作

車響猶從耳畔聞已除席帽浣塵氛商量便擬攤吟卷屏
當還須展篔簹紋竹院夜啼汾水雁紙窗晴濕太行雲悲秋
倦客俱無賴差喜幽軒半畝分

屋後望太行山歌

懷州十月天氣涼朔風慄慄吹邊牆已拚窮命犯霜露所
喜僻地饒松篁假館正背一池水繞榻恰圍千步廊藥欄
棐几頗幽靚禽音谷韻殊鏗鏘倚天拔地一峯出排青滴

黛難爲詳雜糅苔翠作毛髮團鍊仙靈爲橐囊鈞簾觸眼
詫竒譎竟逼衡華凌嵩邛回思我昔走燕趙路與山色相
低昂曾從真定望肩背今到河內窮毫芒猗嗟此山障全
晉綿亘西北開雄疆二陵風雨古今恨三關鼓角風砂颯
鴉兒軍護李亞子憶昔格鬪塵朱梁伶人前奏百年曲從
官會飲三垂岡雄豪雲散忽千載尚留窄客誇金湯太原
城闕空壯麗澤潞兵馬誰精強可知人事總銷歇何若巖
壑繁景光掉頭便脫五濁世洗脚竟齋三日糧或言此山
不可上怪物惡木聲礮礮百盤陡峻類左擔千里囚僮如
騾綱呀然失笑容言誤人間何處無太行風波舉目盡瀧
吏瘴厲多時逢竹王君言峭嶠阻登頓詎若朝市難隄防
生平跳盪虎食肉倏忽摧頽鳥啄瘡言罷山靈更呈媚變

幻金碧森開張老夫失喜復大叫石銚正沸秋茶香

懷州歲暮感懷

黛色憑欄指顧收太行斜壓郡西頭城連沁水喧河北雪
積雲中冷澤州落落可憐邊塞客栖栖還作稻梁謀何當
快馬嘶風去老作三關萬里游

其二

千年華蓋在人間從古仙靈此駐顏玉瀝金漿成濟瀆丹
梯紺壁照壺關欄前全晉秋明滅巖頂諸天夜往還搔首
漫嗟人世事烟蘿咫尺未能攀

懷濟源
王屋山

其三

急裝夜發北風襲立馬層崖鞞轡牢月上沙洲帆似豆水
繁棧閣路如毛木蘭寨北愁狐立藥櫃溝南獵犬號消息

此間曾百戰天寒誰爲貫村醪

其四

酒盡燈殘戍角哀鈎簾繞柱只徘徊枕欺獨客眠難着衣
迨長途綻復開故國愁聞魚大上今歲江中大水中原喜見雁重

來九青憑誰驅使排幽興寧郭詩人李杜才李杜才武陟人崇禎間詩

人時讀其詩

覃懷雜詩

朝辭沮梁陰暮宿藥櫃右烟投麥隴消霜積蒲塘厚稍稍
逗晨曦微微集村叟商量到晴雨軟欵話儕偶足知唐魏
間儉嗇誠不苟我行適見之停鞭亦何久漁柵響水聲飛
花落枋口

其二

掛席渡黃河濁浪聲喧虺軒騰失榮澤掀簸轟奔雷魚龍
一以吼日色如死灰置身瀕洞間徒令志士哀我生蘊風
義自命爲雄魁四十百無成乞食繁吹臺敝車類雞栖撥
慢令之開長嘯大河北昔人安在哉

其三

端清鄭世子汲古搜琳瑯讓國駕州來博聞追獻王非無
千乘尊唾棄在路旁獨把一卷書仰面看屋梁鈹鏤繪春
牘穿穴銘嘉量放厥瑰麗詞作爲宗社光我來購遺集拂
拭生古香雲霞一焜耀珠玉爭弄藏亦有梁王園白露濡

金牀

其四

昔與鄒祗董以輩散髮弄鳴琴髯同嵇阮流連在竹林

網繆擬靈匹惠好踰同衾白日忽西頽浮雲爲我陰董旣
喪家寶鄒亦殞國瑛不堪河內郡惻愴痛知音

時新聞
程村計

其五

軼關在何許百里盤青蒼長謠有所思獨立慨以慷我思
古聶政鼓刀於此旁一身許嚴仲抉眼屠肺腸暴尸韓市
上聲動諸侯王分裂詎不悲然諾那可忘足知烈士心
皦凌秋霜俠哉郭翁伯後先居此鄉作人雖陰賊意氣真
堂堂

其六

月在秋山上人在秋城裡月高人漸清四面砧聲起聲亦
不在少聲亦不在多一觸秋宵心令人喚奈何沉吟尋此
聲斷續何時已半上太行山半落汾河水

其七

驚飈一夜發烈烈吹三關白日冷狐裘層冰陷刀環我意
適不樂前登太行山谿壑自崩迫屈盤何險艱道逢游獵
徒鳴髀驟孱顏百里盡鳥獸流血車輪殷我有酒一壺與
君叙燕閒飲酣話平昔淚落誰能刪却上宛子城悲哉汾
晉間

歲抄過吳門訪沈韓倬范龍仙值其越游未歸悵然

賦寄

爲有懷人意扁舟繫水涯如何臨頓里落盡馬塍花儉歲
歸應早殘冬日易斜所思終不見數盡後棲鴉

湖海樓詩集卷五

宜興陳維崧其年著

無錫嚴繩孫蓀友

弟 維岳緯雲 參閱

澤州 廷敬說巖

宗石子萬

合肥李天馥湘北 選

男履端

華亭王頊齡瑁湖

姪 洵 校

辛亥

首春于吉人招同潘子遜孟升過飲飲罷即出城汎

舟游梵川歸復於鶴和堂觀吳兒演劇作詩紀事

羈客忻嘉招熙春撰游屨入門無人聲茶花落成雨主人

靜者流物外領幽素三間臨水軒一卷南華註久知金壇

釀碧色滑如乳况君高嚴性屏當到羹瓠我甫離家園心

情正錯互今日坐君筵始信懷鄉誤一飽固是佳皇天詎非數

其二

酒半潘生至一座爭轟厖主人顧君言頗怪遲遲來君言乍入城步履多沿泗家家賽春社處處傾春醅遇酒輒復留坐失相追陪獨君容貌莊未覺形神頹我今慚小戶君醒胡為哉不見辛夷花架前亦已開

孟升後至

其三

君家足別業其一曰菴川結廬在曠邈此景爭流傳離離隴畔苗窅窅波中天花撲一陂水窗低千頃烟聞言果幽尋出郭相緣延遂囊松下琴小摘湖頭船格格水禽飛竟逗籬門前

其四

到門畧徇斷徒倚空園立不聞人語聲但見溪流急呼僮指仄徑此險或可襲水雲無定主但躡春烟入稍聽竹響繁遙辨人踪及遂由所尋路步步學蟲蟄出坎淑景呈開軒霽光浥爭投林檻坐互笑芒鞋濕乃知向來事得力在幽澀

園橋已斷不得過從別徑始達

其五

我愛白石堤歷歷春澗邊譬如美人黛渟泓還藐睞又如瀟湘波微風吹可憐林樾互向背水木交澄鮮其旁翼精廬縹緲冠輕烟漁莊暨蟹舍綴若蜂房懸柳碧婦曬網花紅人種田登臨亦以暢記憶奚能全獨有隔水樓盈盈當我前臨流不能渡空香何灑然

其六

鈎簾弄潺湲歛見波中石高寒見情性皺瘦露風格于子
向我言石亦有疇昔唐時戴叔倫千載號詞伯生時仙靈
氣塚傍華陽宅此其墓前表歲久蒼苔積主人夙好奇移
歸樹池隙聊申峴山感匪止袖中癖言罷各沉吟世事總
陳迹潭下有漁翁聞言笑啞啞纜船白石根穩臥春流碧
楚川池中有一石云
係詩人戴叔倫墓表

其七

曛黑入城闐市火生青烟君家正夜賽雜坐鳴春絃吳兒
更雅靚裙屐爭喧闐我生硬腰脚半醉呼王前獨是歌絲
來便令心志偏聞言不待召闌入升華筵倒屣盡老蒼絃
服多少年當其夜氣肅益覺歌場圓月曉出門別銅槃半

明滅

大梁署中春暮寄懷宋蓼天學士

憶昔讀書學士家書軒恰傍長洲斜綠帆細掠包山雨白
帽閒看鄧尉花此日吳天詞賦盛計甫侯德研諸子知名姓

獵騎偏將柳絮縈妓堂更得花枝映我時高咏在江東挾
瑟鳴箏事事工皂筴橋頭春寂寂枇杷樹下雨濛濛人生
萬事無不有疇昔韶光今在否陳生落魄計生窮上谷墳
前誰漬酒羨君視草直明光何論三十侍中郎宮簾捧出
青綾被法酒擎來白玉堂西山爽撲朝元殿我到燕臺一
相見感君意氣真傀俄憐我行藏轉衰賤廿載傳經祇自
悲大梁門外草離離卽今雨卧侯羸館絕憶春游短簿祠
鄴下寄懷紀伯紫

別君長安城送我長安路風添易水波雨積黎陽樹別後
思絲絲分携定幾年爵臺高處望泯泯水和烟君逢故鄉
人訊我平安否我差眠食佳但感別離久負手起躊躇寄
君尺素書憶經束髮後便擬結相於展我客中書悉我書
中意男兒失路時所恃只知已隻羽到蕭關春寒道路艱
君知行役苦早促雁鴻還投筆一沉吟沈瀟清吹歇此時
林慮山正滴中宵月

鄴臺懷古

姊歸啼歇野花殷惆悵春還我未還四月輕陰連鄴下千
秋陳蹟滿人間繚垣鏤澁防鄉夢隔寺鐘來攪客閒絕憶
故園梅雨後魴魚初賤竹新斑

其二

當塗家世大長秋漢室河山指顧收霸府三臺誇割據名
籓八斗擅風流盡陶趙魏成鴛瓦別倩姮娥直綺樓鏤枕
空貽羅襪冷漳河冉冉不勝愁

右曹魏

其三

鄴中故事傳聞舊紫陌宮前紫陌橋風起伎衣飄殿幄月
明軍鼓切雲霄遠移洛下銅駝恨長嘯中原石虎驕十九
年間迷翠輦現華春草路蕭蕭

石虎都鄴十九年現華其宮名右石趙

其四

丞相高歡渤海王數傳龍子盡披猖誰誇建業生蓮步自
有貧兒賣酒坊

高緯於密室作堂側作貧兒村躬爲市令令貴妃賣酒

仁壽于門包第

宅韓陵片石龔文章小憐粧洗原難竟不許齊師陷晉陽

右高齊

其五

鄂國勲名載汗青艱難百戰陣雲深松楸死尚羞奸檜桑梓魂知戀蕩陰一代金陀標信史

忠武孫珂著金陀粹編五十八卷

五更

鐵馬春悲吟侍中

稽紹濺血處地名浣衣里

遺廟相隣並宰木桓碑炤

古今

右過湯陰忠武故里

其六

神虜山前落炤橫臨洛驛走滎陽城誰為燕趙悲歌士猶憶邯鄲俠少名壁碎庭前留意氣車迴巷內見生平羗村月黑無行跡古墓人傳蘭上卿

磁州羗村有蘭相如墓

其七

阿兄昔作臨漳宰飛蓋西園繼昔賢銅爵視傍春判牘鷓鴣陂上夜迴船五湖歸隱頭今白昨夜思君月正圓小弟

鄴城長側帽西陵歌舞事如烟

懷舊臨漳令萬大士大士余表兄也

其八

林慮

音

山勢削諸峯公主關前路幾重定有樵岷通鳥道

虛拚芒屨印狐踪晴連恒嶽金燈現雪斷壺關鐵嶺封溪

媿變名輸夏馥何年來作冶家傭

擬游林慮未果

將去洛陽燈下感賦

露幌風簾思不禁巡檐背手重沉吟一城漢苑隋宮地幾夜零砧斷杵心菊到將離分客瘦天因臨別釀秋陰偃師明發應回首洛水嵩雲深更深

一日射五虎歌為宋牧仲使君賦

黃州城外日色涼白茅苦竹啼高岡江山亂後饒怪物腥風霍霍來妖佞使君椎案裂眦怒對客不暇作急裝從奴

十騎紅韎韜，看袞鬚眉張。一虎咆哮壞古冢，一虎戴頭立而恐。復有兩虎左右嘯，塌谷崩崖浩呼洶。最後一虎毛色斑，勢壓百獸逃。獅鬣嚼齧掉尾一奮擲，直撼坤軸搖天關。使君射虎如削草，意思安閒洞淡官。須臾矢作霹靂聲，一一從空碎其腦。其時江水聲礮礮，金盤割肉盛車箱。解鞍命酒讌僚佐，醉摩赤壁呼周郎。歸來雪堂日未午，父老作歌誦明府。前有昌黎後竹圃。牧仲齋名古竹圃君不見潮州鱷魚黃州虎。

宋徽宗畫鷹歌爲宋景炎吏部賦

吏部簷前日杲杲，粉壁風廊媚晴昊。中藏墨繪萬軸強，惟有角鷹圖絕好。東京良嶽全蕭瑟，此圖還是徽宗筆。斷墨零紈風格蒼，畫圖颯爽森開張。錦池傍識太師印，臣京細楷注兩行。御押稜稜如蠶尾，依稀天下一人字。墨崩半落不落雲，紙濕將傾未傾水。嗚呼丹青有道鷹，有神此物趨捷真絕倫。只知絲管宣和殿，誰信烟沙五國城。繁臺當日秋鮮新，臂鷹子弟紅領巾。綠韉雪鏃光如銀，下視狐兔皆輕塵。無情汴水堪悲咤，一出宮門淚珠瀉。數傳可惜趙王孫，不畫奇鷹畫凡馬。主人語客夜未徂，且復陸博爲歡娛。人生哀樂亦常事，不飲嘆息何爲乎。況今聖德奠八樞，南服甌越西巴巫。諸公袞袞多廟謨，百姓歡樂賜大酺。請君篋此勿復掛，重寫騶虞麟趾圖。

抄冬九日雪後月出同叔岱夜宿季嵩齋頭漫賦

相携乘興叩柴門，准擬從君命酒樽。月色況能添雪色，東村近喜接西村。數篇脫手歌偏劇，半夜無風星轉繁。騎馬

衝泥吾已怯擁爐終欲待朝暾

懷弟半雪同叔岱梁紫賦

具區淼淼水雲鄉上帶青門舊草堂
千片疎層陰蟹舍兩溪飛雪點糟床
焙茶僧到籠猶濕販橘船迴笛亦香
此景總輸家弟樂中原獨立意茫茫

風雪中東西村侯六丈

千村檜栝助陰霾萬壑刁騷動地來
實怕殘年遭屋漏可堪故國正梅開
蕭蕭老客謀生拙莽莽中原對酒哀
絕憶西村侯處士雪中曾否臂鷹回

見官哥因憶仲衡先生泣然賦此官哥仲衡幼子

侯羸倣儻好權竒然諾交游天下知
為我衰宗謀絡秀從君別墅選花枝
遲來終愜挑琴願再到翻愆磨鏡期
今日

書郎能出拜朔風吹淚不成絲

雨雪不止和杜陵後苦寒行二首示叔岱梁紫

荒村凜冽人跡絕昨雪嵯峨伴今雪積雪不消諺有雪等伴之說千條
簷溜只檐門化作虬枝敲不折羣鴉欺我屋昏黑公然噪
呼口流血老夫髯張更毗裂

其二

樓北陰森多宰木挾以寒風號我屋三年忍凍皮肉僵
多謝故人半當軸我生時命一何酷客冬騎馬衝流澌河溪
冰滑心自知

冬抄十六日九青風雪入商丘賦詩懷之

雞鳴白月盱眙縣馬滑黃河武陟城俱客偕汝風濤剛隔冬事
歲累卿冰雪又單行伯桃作客衣裳薄狐偃從亡骨肉輕

此意淒然吟不穩粉箋濕透淚盈盈

恭士攜具同李白公過八關齋看顏魯公八角碑并

訪雪笠上人薄暮始返賦韻紀事用杜陵韻

蕭晨出郭門心境兩清絕陰岬素波陽坡削寒鐵霜皮
苔蘚積石腹松栴裂迢迢寺中磬隱隱林端雪巾拂蕩塵
氛茶瓜了禪悅耽空萬慮消忘機寸心折捶琴掩松關下
界景明滅平生荷篠心白首抱慚熱

其二

魯公學道人遭遇殊險惡高名撐板蕩大節挺盤錯至今
所書碑深心爲鏟削圍蹙勢鬱盤鈿織墨崩落觀其嚴緊
極詎屑學孱弱鐫刻囚蛟螭雕鏤僭蒼漠氣吞丞相碑惡
彼辱東嶽我來捫孤亭元氣恣森薄會榻萬本強携歸嵌

寥廓庶令忠孝蹟古香噴寂寞

其三

阿師吳中人昨渡長淮岸洗盃尋孤烟鳴榔泝晨漢鉏園
梁宋間藥闌葺已半井洗春泉清梵雜隣鳩喚每當粥鼓
暇時寫林巒漫琴几對徜徉丹青自蕭散我顧阿師語此
地曾離亂出寺望殘城愀愴發深嘆

其四

同行得我友恭攀蘿袂沾濕道逢奔競流嗤爾作底急掉
頭笑不應欣此幽人集傾釀發芳香烹蔬愛酸澀賢甥白
長笛手李暮所不及感激吹一聲恍惚天龍泣

其五

高蹈徐徵君通屏跡厭塵土今晨約偕行登頓暢懷古延

緣久不來妙香消一縷屐響候寺門日影晚庭柱歎息謂
徵君人事隨零雨管榻固自佳點瑟亦堪取纍纍千載人
陳蹟等倉廩不如爲讌游我儕實有數

十峯草堂歌爲梁谿錢礎日賦

錫山九峯峯色幽芙蓉九朶枝相樛淳膏蓄黛千巖暝潑
翠流丹萬壑秋春申礪抱梁谿曲茶經水遞標名目亭值

高人清悶樓

元倪雲林

園開勝跡愚公谷

明鄒愚谷

鴻山支蒸

華鴻山寮

二泉詩

邵二泉寶

高憲

顧文端

東林有舊祠山川靈異洩不盡晚

出一峯峯更竒此峯借問復誰是依稀記說彭籤子當年
江表尚昇平我友翩翩起盛名才調數峯湘瑟怨家風千
弩錦衣城同郡時尤推數子董相文友鄒陽詩吾共爾會飲
頻經公主園築球竟出將軍里任達佯狂世所憎青鞵皂

帽興堪憑壯不如人甘落薄身將隱矣怕飛騰銅仙淚濕
咸陽樹人生禍福寧非數南國旋聞告密興北司已報刊
章捕此時事急鼓隴胡此日交游孰借軀牘背微文尊獄
吏堦前惡草夾黥奴洞筋擢髓尋常事掉頭只欲行吾意
笑談何惜提湯烹慷慨猶能仰天視司敗亭平自不冤謗
書三篋任飛翻覆盆卒白諸生枉破械終銜聖主恩歸日
蒼涼吟飯顛鬻畚削漿無不可漢廷盡避次公狂齊女休
嫌郤克跛三吳徵稅急軍儲粟里羗村少晏如芒屨遠尋
華不注短衣直上豎無閭三年奔走泥沒膝親舊音書那
可必濁酒難澆董相陵寒灰不轉鄒陽律時文友詩蕭然
猿鶴怨山阿余亦飄蓬客兩河北使竟傳游子訊西風催
作草堂歌停歌一問平生友草堂松菊今存否君不見耦

耕偕隱事堪求白髮滄江好唱酬莫使山靈長獻誚一峯
飛去九峯愁

牧仲招飲卽席漫成絕句

家傍寒山寺外橋隨耶千里學吹簫坐中大有他鄉客何
必思鄉瘦舞腰

其二

萬首詩凝粉壁光東牆吟罷復西牆就中最賞汪員外七
字長城格老蒼

壁間有余友
汪荅文詩

歲暮客居自述做渭南體柬知我數公

此生自斷只由天僦屋睢陽也偶然悶喜牆頭賒秫過慵
貪床脚撥書眠定辜舊隱梅花約判結他鄉栢酒緣總苦
差強窮塞主陰山雪窖十多年

謂陸子玄吳
橫槎諸子

其一

三間老屋朔風啼土坑灰堆掩蒺藜極詩瓢憑壓疊貧
來醬瓿累提携晴央阿段晨編柵雨走奴星暮乞醯自笑
一生矜澗達今年屏當到雞栖

其二

三寸毛錐百不成白頭壁立笑浮名姬愁臘盡催辭竈鄰
怪囊慳勤入城着眼乾坤偏偏側撐腸文籍漫膨脝誰憐
吳郡真男子溷作中原賣餅僧

其四

貸粟監河擬上書封題纔濕又躊躇叩門早信言辭拙被
褐深知禮法疎豈有斯人工造請從來吾道在樵漁羣兒
錯料貧原憲決計來年把短鋤

其五

朝出南村夕北莊經旬十遍坐君堂雞來上黨盈門沸蟻
熟中山一夜狂土銼細蒸園菜美銅瓶深注蠟梅香都無
一事爭相挽猶勝城中過節忙紀與叔岱季嵩
二丈月來踪跡

其六

叉手張願復將鬚飛揚感激詎全無三句不火子桑扈五
十稱詩高逵夫頗有數公將食器謂叔岱季嵩
數文諸君不然一老
困泥途綿綿又下經冬雪啼殺荒村白項烏

其七

三年糊口東京道故里良朋共往還鞏雒歸來成獨往平
臺別去重相關官厨臘酒知仍綠客舍顛毛定許斑可惜
離羣艱會面北風簷溜響潺湲專東汴
署諸子

其八

緘書千里寄情親數載相依作比鄰莊鳥病猶思返越孟
明囚豈忘歸秦雪溪老馬難知道寒重荒雞易失晨多恐
旅懷新歲劇討春實怕異鄉春懷路廣心史蘧菴周立
五徐竹逸里中諸先輩

其九

朝來雨霰復侵尋乾雀簷前空好音歲月老閒橫掣手關
河寒透倚樓心冰封古硯愁無那雪壓疎籬冷不禁弟妹
飄零書信隔何時窮鳥再投林

其十

兩徐蒸土
邇黃三宋牧仲
昆季今詞伯異地同心興不孤一自荒郊
耽寂寞多時高閣罷歡娛新詩篋底吟安否積雪堦前掃
竟無聞道春光連草寺肯携幽屐伴潛夫

壬子

元日雨雪凍侯六丈

今年元日倍愁儂
跛脚茅齋事事慵
急雪稀聞喧社鼓
迴飈時一送鄰鐘
霏微漸覺孤村濕
緬邈徐看短壑封
剩欲過君傾百盞
街泥何計好扶筇

二日雪不止

新年雪壓客年雪
昨日風吹今日風
雁聲只欲發人屋
駭勢苦遭颶滿空
田夫龜手拾馬矢
鄰媪蜩縮眠牛宮
安得普天免凍餒
白頭寒拙甘途窮

三日晴

天明風定飛雪乾
老夫晨梳凭曲闌
千村曙色忽已動
一年幽興來相干
啟軒便擬曬藥裹
策杖竟欲尋林巒
鄰翁

告我泥沒蹀且復却坐愁蹒跚

立春前一日同叔岱過飲恭士齋頭時雪笠梅溪二
上人在座

連朝陰曠客愁增
今日新晴興可乘
開甕剛留殘臘酒
衝泥恰到過江僧
由來梁苑多飛雪
何必春宵始放燈
醉極已聽街鼓動
銀幡綵勝思騰騰

恭士牧仲約我元夕入城前一日恭士復遣騎至屆
期雪作竟不成行悵然屬咏

梁孝王園火樹生
故人飛鞚遠相迎
愁心擬破傳柑夜
好會偏來急雪聲
西市定憐橫吹斷
壓簷空訝亂瓊明
賞燈最愛衣沾濕
只怯銀鞍傍險行

十九日雪中撥悶寄雪笠梅溪二上人

薄雪刁騷打紙稜閒窗澹墨意難勝此時開士同孤鶴長
日禪房伴凍蠅野店更賒何處酒春城定負隔宵燈詩成
天冷誰爲我投與開元寺裏僧

次日同恭士飲牧仲景炎介子堂中復成拘體一首
牆東城北只數武着屐謀歡寧厭忤久客顛毛侵雪白高
齋酒面潑鵝黃已將歌扇惱禪叟定遣幽花愁漫郎隣雞
遮莫更三唱要看紅日升扶桑

首春留宿恭士齋頭幾及十日別後長歌奉懷用昌
黎寒食日出遊韻并柬荃伯牧仲景炎介子諸君
連年中寒腰脚病今歲入春寒愈甚辛盤苦受惡風刮彩
勝剛來殘雪映絕憐元夜火城匝最憶朱門歌板競十日
竟宿徐卿家並床只理洛生詠此時月館開窈窕此夜春

樓對端正顛狂偏鬪鶻舞回歡譙那愁雞唱更開憑短屐
聊當家貧託長鏡以爲命夜談直擬倒星河長出每逢斜
斗柄覓酒南街串不休得句西堂走相慶晚歸每增小婦
志陽狂頗減里兒敬昨宵放燈景益奇數客開尊興尤覺
屏出陽阿惱藥王瓊瀉新豐中酒聖灼灼花隨絳樹添嘈
嘈曲與哀絃併共諂迂閒非世情實怕沉酣滅天性今早
春城一騎出瞥見寒花數枝橫舊雨纔歡酒暈融殘冰已
怯霜蹄送我愁好會隔芳筵便知貧女辭粧鏡更執鞭弭
僕尚能重主敦槃子爲政抽毫渺渺腸詰曲伸紙蒼蒼勢
嚴勁何日還傾一斛珠相從再拍六么令

徐家小兒行爲恭士賦

徐家小兒捷於猱大聲嘈呖駭雷吼殷床撼壁撞華鐘軟

語猶疑若談話還有大兒工讀書英英膚色玉不如只將
恭謹鬪筆墨肯效跳躄嬉堦除人生生男要識字阿買何
當中驅使更羨李家小衮師頗聞似舅何無忌丈人似此
百不愁日飲美酒烹肥牛莫憑夜月緡青史且放春燈照
白頭

子萬弟三十走筆相示

失怙我年三十二弟剛十四泣相扶此時誰卹任東里邇
日人知孟少孤壯歲青春須愛惜客中紅燭倍歡娛年年
聞盡高齋雁肯信今宵對飲無

咏雪用昌黎韻

飄瞥疎還密迷蒙去復來入春寒尚凜未曉曙先催綴箔
珠堪並穿軒絮或猜輕颺花六出重疊雪千堆月出憑相

照風輕任却迴驟驚翔屋杪旋遣糝庭隈瑟瑟天樞斷瑋
瑋月斧摧一軍銀鎧甲三戶玉樓臺素倩班姬織綃從鮫
女裁行天疑毳羽舖地徧莓苔那許金盆掬惟容縞袂授
辭難窮詭譎狀益訝瓊瑰急下團成片徐篩薄類埃捕空
翻冉冉辨色總皚皚瑤瑟彈天女瓊扉舞善財玻黎填馘
虬優鉢積崔嵬鐵柱殷溪泆冰車若暮雷噫成大塊氣膠
盡坳堂杯萬馬霜蹄動雙龍粉鬣開連畦誰緯經無蒂孰
栽培數點零還續兼旬下始纔仙人持作飯隣女認爲梅
冪歷東西惑包羅鉅細該曹衣真掘閱謝咏只徘徊倏忽
成三島須臾匝九垓冷堪隨漢節酷更劇秦灰幡已遲花
信爐方熱芋魁蒙頭銀海眩企脚玉山頽壓背兒童鬧張
頤語笑厖捏獅脂築玉燃蠟火成胎刻畫形偏肖雕鏤理

莫推汝狂惟跳踣吾老只悲哀楚豫三年旱淮揚闔郡災
所憂關粟麥誰免訴餅疊詩獻當塗子時需燮理才兩工
愁蹶躡早魃怕毡毳祝史休紛若農官尚敬哉我生寒到
骨欲語路無媒襁績辭空費艱難志未恢詩成慚劇臂聊
以鬪嬰孩

留滯城中幾及旬月叔岱見訪不值作詩見示次韻

一首

眼看花發怕花飛每遇看花便不歸縱使銅街泥滑滑不
妨紅柏燄微微情多作客懷偏左老至傷春願縱違暫出
愁予關竹院終來共汝襞荷衣

何烈婦

烈婦夏邑楊定遠妻也定遠亡烈婦自縊以殉時

甫出嫁一載友人彭士報來徵詩遂賦一章

青絲紅綠絲是妾手所治持以事君子爲妾克光儀春雲
鮮采采嫁夫剛一載夫死不復生妾身更誰待引絲潛入
房畢命君子旁雙旌映門戶白日無晶光吹玉笙擊銅鼓
楚覲歌越僮舞君不見夏邑城中何氏女

仲春九日牧仲堂中大合樂走筆作歌次昌黎贈崔

立之評事韻

文康事業繩莊敏累葉高槐森不盡公子青春侍紫皇高
門白晝闌丹軫晴天爨弄廣場開皓月箏琶么拍紫銅槃
客食噴若蠶鐵市樓居幻成蜃時余惡臥類蟲蟄恐凍苦
吟雜螻蚓君言何憊子且起今者不樂古所哂盡料十隊
醴笙簫醴抵六宮鬪邢尹麴部方衝恨壘堅花奴又破愁

城窘此時壁帶晃簾戶此夜地衣薰欄楯翩翩俠客脫襦
襦袞袞狂夫聯鞵鞞詭譎寧顧鄧艾吃跳跟誰甘孫武臚
就中賤子最飛揚頗怪年來只悲悶憶違越嶠與吳濬不
聽高吟併漫引空遣蠻歌佐飢餒那取嬌歛侑櫻笋何期
仙籟發人寰恰似天風嘯虛牝舞衣軋軋阿錫歌管嘈
嘈折籥箇此樂轟轟天下無縱死悠悠會當忍竭來萬事
悉秋毫不然千歲同朝菌歌闋西傾走月兔筵散南飛指
霜隼本師拍板尚喧唳弟子腰肢豈粗蠢嗟余只欲瀝心
血作詩便擬鉢肝腎餘子休嗔我輩狂後期未必他年準
實怕檀槽拂曙收深愁銀燭因風殞老夫明日出城郭回
首華堂隔畦吟盤空句硬何足奇雅會聯圖垂不泯

初晴往孔樓卽次叔岱韻

今年寂寂卧春陰早喜籬門霽色侵却爲愁多貪會面須
防別遽暫論心梅添北垞抽新萼禽坐南榮弄好音莫問
城中年少事村居端藉兩人深

過高都護水榭

將軍亭榭亦佳哉出郭爭携步履來春水半城昏似夢野
花二月短如苔園荒怕有朱欄坼日落愁無盡槩開還是
永和修禊處風流不見使人哀

水榭向係侯氏斯干堂

訪一無上人不值小坐妙香樓下

上人亳州人薛君采後裔

禪師結茅處聞在宋城闈高祖薛君采新詩湯上人我來
不相邁微意與誰陳日暮坐苔石所思慚隱淪

贈沙隨成質次

沙隨城裡初爲客便到君家坐夜闌明月照人蓬髻醜春

風吹汝草堂寒一尊剪韭花將放三徑扶筇雪已乾此日
論交休恨晚天涯及爾共盤餐

胡叔度招飲東郊別墅時江梅初放花下賦此

寺前春水太分明郭外江梅無數生只爲相邀乘野興況
緣作客愛新晴幾枝炤眼愁先破半朶捐籬粧欲成觸迂
鄉愁信無賴不須吹笛助沾纓

徐岐離史蘭幼自汴署南旋聞余在此間顧我於寺

寓流連惜薄暮出城時正值上巳也

春潭面面綠如烟每爲微吟立寺前正愛風光當上巳却
逢伴侶趁歸鞭留沾禪榻茶瓜供到及江城穀雨天惆悵
同來不同去夕陽相送只淒然

客春余同
二子來汴

綵雲常戲九青爲小錢兒遂成一絕

買斷春光杏子紅河間織手數偏工可憐榆筴繩牆遍輸

與風流小沈克

錢之小者
名沈郎錢

其二

簸來春晝綠窗便入手應知似月圓匿笑也須防口吃莫
將人喚作錢錢

錢錢古
美人名

清明將發沙隨謝成居左趙村看花之約兼別其令

弟質次

趙村村裡桃爭放邀我來看借馬騎不爲空囊辭地主也
貪高閣賞花枝一年撥火人將別三月銷魂髮有絲料得
君家好兄弟每逢寒食定相思

圓通閣寺門卽目

殘城延古寺細岬夾春塘寂寂落暝翠幽幽聞野香花溪

垂釣客竹罨浣衣娘跌坐少言說吾師齋磬涼

次日過飲虞服齋復偕梁紫季嵩坐後園桃樹下

惜春怕逼棟花期併日尋春也不遲却坐盡簷窺淑景旋
憑別圃選繁枝牆低子便隣翁摘葉弱花從隔院垂安得
盡栽千百本風光彷彿亂盤螭

吳下蟠螭山
桃花最盛

同邇黃梁紫過仲衡先生園中感賦并示叔岱

柳綿千片白如銀記許高人共結隣再到短牆門屢閉一
思前度跡俱陳辛夷放日園丁老鴨鵝啼來菜甲新爲語
同游花下侶花時莫厭酒沾脣

劉篤甫更字藜問題其冊子

篤甫千之先生令
嗣子之名伯愚

爾何不學東平生殺人市上洩不平又何不學晉劉毅一
擲百萬丈夫氣復何不學淮南王丹成雞犬亦得將胡爲

只學劉子政穿穴史籍以爲命兔園冊被老生齧鴻都文
與經師競男兒墮地骨骼竒學書不售禰大癡下床動足
有萬古安用刺促毛錐爲君不見閣上燃藜非俊物道旁
荷鍤真可兒

三月二十七日過川如園中看牡丹

今年啼鴉太匆匆落絮游絲颺滿空忽見名園開國色拚
憑短髻鬪春叢百年淚濕圍城日

是日爲壬午賊
破宋城之日

三月花

吹捲慢風細馬單衫成往事可憐仍對半欄紅

憶仲衡
先生也

次日過友人園看牡丹時叔岱以鬪雞他出

錫簫聲斷柳綿催載酒東園側帽來春欲暮時陰最重花
無人處放還纔半頽粉臉紅潮濕亂覺明羅玉剪裁却怪
鬪雞坊底客畫闌長鎖一枝開

侯六丈宅看牡丹五首

藥闌重到已無聊，昨日穠花今漸彫。
五載飄零逢酒住，萬般惆悵爲春饒。
粧啼細雨如相訴，臉暈微波故見招。
不待將離開始別，一鞭回首怨迢迢。

時芍藥將放，余以歸亟不及俟矣。

其二

東風曾到善和坊，弱柳輕籠畫錦堂。
春去紅英偏有分，夢來紫艷未曾忘。
玉釵狼籍簾雙軸，綺幔高低燭萬行。
今日戟門誰是主，野花零蔓上空牆。

余家浩然堂前當時牡丹最盛。

其三

薛氏堂前連夜雨，吳江縣裡滿欄花。
當時彩筆全無敵，何處紅樓不是家。
一片濃烟籠芍藥，五更深巷響琵琶。
春娘嫁後玲瓏老，頭白中原鎮自嗟。

丙申春同吳門諸子看花於薛偉楚合綠堂丁未春

同松陵諸子看花於吳聞璋宅兩處賦詩俱爲阮亭所賞

其四

風光四月浴蠶絲，拂檻初開第一枝。
爲憶曲江全盛日，剛逢天寶太平時。
珊瑚石尉敲千尺，車隊楊家闔五姨。
千載沉香遺調在，淒涼法曲許誰知。

其五

洛陽花譜散如烟，異種鄴陵也可憐。
邇日看花惟有恨，幾朝被酒不成眠。
都無海燕巢金屋，一任啼烏噪野田。
何似江南好風景，家家步障漾晴天。

丙辰

余不作詩已三年許矣，丙辰秋日秬園先生同小阮大年令嗣天存過訪，且示我明月詩筒一帙，不覺

見獵心喜因泚筆和荔裳先生韻亦得十有二首
辭旨拉雜半屬調語先生第用覆瓿慎勿出以示
人也

秋霖兼腹疾偃仰此西軒門外屐初響簷端鵲亂言顛狂
拋藥裹浩蕩撥吟覓所媿蓬蒿巷還憑破蘚痕

其二

僕病已踰月吾廬祇半間婢因伐菽去僮適荷鋤還一衲
經秋破雙扉映竹關莫嫌供給少相餉有溪山

其三

怕說君家事令人作達妨一門蘓武節半世管寧床雲水
荒前夢關河落晚涼更聲真歷歷似爲兩人長

其四

聞說幽居好爲園特地清柳梢浜曲折荷葉浦縱橫蒼靄
陰晴互空濛山水爭何當衡宇並軟語話躬耕

其五

新詩殊兀冪百變任雕鑿蝴蝶爲莊叟箏琶雜阮咸酒盤
頭判沒石闕口休啣物色兼生態芭蕉漸啟函

其六

詩律三年廢長瘖學凍烏倚聲差喜作老興未全孤辛柳
門庭別溫韋格調殊煩君鐵綽板一爲洗蓁蕪

其七

水榭論心切秋城話舊宜儻過燒澗笋兼爲剪園葵老悔
求名早貧增見事遲傷心吾共汝流恨竟同時

其八

詩筒連月影掩抑怕微吟屈指追朋好同心抵向禽捫時
同故劍檢罷半亡簪鴻爪誰相待成連或可尋

其九

侯計皆吾友論交學士家每携雙斗酒同看半塘花識曲
琴心愜藏鈎燭影譁黃公壚在眼濁酒可還賒

其十

埋玉何愁早傳經幸有人門終還榮戟筆已撼星辰絕學
薪傳火華年日在寅古來推大雅期爾定扶輪

其十一

驥子真天馬奇毛掩鸛鷄揮毫偏渾脫琢句必精良薄俗
輕彈鈇吾徒老削漿好携雛鳳嘯織月壓歸航

其十二

菴畫微波動遊踪勸爾淹到增狂態劇別更旅愁添陸叟
真高士王君古孝廉脫歸承見訊鴻冥不須占

丁巳

馬殿聞筵上食河純作長句示湖中吳志伊諸子



東風吹雨磨作絲青鳩飛上細梅枝野夫懶惰何所作食
指不動如懸槌朱門設食併召我躡跚肯俟細馬騎江南
二月殺紋滑雛鶯纔喚笋出籬鵝肪雞黝色映盃野鮮海
蠶膏流匙鯁駘出水倍雋永汗滓點滴成玻璃吳娘作膾
攘皓腕霍若跨馬黃鮮卑頰盤高堆春雪乳霜刀亂剝輕
紅肌老饕據几便啖嚼上客輟食頻嗟咨俱言鮭肝藥人
物脫復下咽難爲治我時放箸大嗚噓所見毋乃誠偏陂
諸君浙產舊濱海蠶帆蛋雨恒迷離雪山一片吼蛟沫紫

颶萬斛腥龍滌紅蚶綠蠣頓頓食魚又芋網家家持胡為
 睹此便瑟縮却當屬屢翻然疑豈逢王郎懼水厄或誤爾
 稚箋蚍蜉君不見鳴鍾列鼎具五毒藿食亦復誰期願侯
 鯖染指詎俊物禁鬻垂涎非可兒羊羹熊蹯召大釁何地
 不愁人命危我生墮地負骨格淡爪出目鱗之而孱軀要
 與麒麟鬪蟲豸瑣屑何能為幡然進七不相勸腹腴獨饗
 慚吾私

第 35679 号

平成 3.11.22

聖和學	928
園短大	子
圖書館	7



Faint rectangular stamp, likely a library or collection mark, containing illegible text.

周

